

續文獻通考

九十一之三

漢書門			
二	四	三	一
八	一	四	三
一	四	三	一
冊	架	函	號

內閣文庫			
九	二	二	漢
四	四	三	書
函	八	一	
一	一	一	
架	冊	號	類

內閣文庫			
番號	漢	2431	
冊數	81 (31)		
函號	294	13	

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



續文獻通考卷之九十一

淺草文庫

皇明進士雲間王圻纂輯

職官考 元祿寺 太醫院 衛尉卿 宗正卿

崇玄署

光祿寺

遼 南面初設光祿寺後以太宗諱改崇祿寺其官曰崇

祿寺卿曰崇祿寺少卿曰崇祿寺丞曰崇祿寺主簿

金 燕享御膳之事皆掌于宣徽院而光祿寺不設

元 光祿寺隸宣徽院秩正三品掌起運米麴諸事領尚

飲尚醞局沿路酒坊各路布種事 至元十五年罷都

提點直寺 二十年改尚醞監正四品 二十三年復



續文獻通考

為光祿寺 延祐七年定置卿四員正三品少卿二員

從四品丞二員從五品主事二員從六品 珍羞署世

祖至元十三年始立尚珍署後罷入有司 二十五年

復置掌收濟寧等處田土子粒以供酒材設達魯花赤

一員令一員並從五品丞一員正七品吏目一人 尚

飲局中統四年置設大使副使各一員俱帶金符掌醞

造上用細酒後定置提點一員從五品大使一員正六

品副使二員正七品有上都六都二局右上都者皇慶

中始置少副使一員品秩同 醴源倉至元中始置掌

管香河蘇門等酒材糯米鄉貢麴藥以供上醞及歲賜

諸王百官者設提舉一員從六品大使一員從七品副

使一員正八品大都上都各署上都掌受大都轉輸米

麴并醞造車駕臨幸公舍供給之酒止設大使直長各

一人秩從九品 良醞署中統四年立御酒庫設金符

宣差 至元十一年始設提點 十六年改尚醞局掌

醞造諸王百官酒醴提點一人從五品大使一人正六

品副使二人正七品直長一人正八品有大都上都二

局上都少副使一人品秩同

珍羞尚飲醴源良醞舊本

光祿所屬元與光祿並隸

宣 供醴源倉稻田提領所安豐懷慶等處設秩從九

品掌稻田布種歲收子粒轉輸醴源倉定置提領二員

亦隸宣徽院

皇明

續文獻通考

國初吳元年置光祿寺并置宣徽院尚食尚禮二局設院使同知院判典簿統二局 明年改光祿寺正四品移太常司供需庫隸之 洪武四年置法酒庫設內酒房大使副使 八年改寺爲司陞從三品置大官珍羞良醞掌醞四署署設令丞監事又設孳牧所局庫俱革三十年復爲寺改署令爲署正又設司牲局改孳牧所爲司牧局 建文中改卿爲光祿卿少卿寺丞分左右陞少卿從四品省署丞二人增監事二人靖難後復故本寺卿一人從三品少卿二人正五品寺正二人從六品其屬典簿二人從七品錄事一人從八品大官珍羞良醞掌醞四署各署正二人俱從六品署丞四人從七

品監事四人司牲局司牧局各大使一人吏二十五人本卿掌祭享宴勞酒醴膳羞之事辨其名數會其出入量其豐約以聽於禮部少卿寺丞爲之貳凡祭祀請省牲進飲福酒胙凡薦新移太常寺凡喪奠供其祭物凡牲果菜雜物取之上林苑不給市諸民視時估十加一凡市直季支天財庫錢鈔凡貢獻果鮮廚料省受之凡器皿移工部及募工兼作之歲省其成敗凡筵宴酒飯番夷貢使降人茶飯物料下程差其等而供之凡廚役久得爲王典膳移吏部凡傳奉宣索籍記覆奏之監以糾道官各一人察其出入而糾禁其奸弊大官供祭祀官膳節筵給夷濟貧之事珍羞供官膳茶飯之事良醞

供獻殿官膳均給內外官人夷匠之事掌醢供祭祀茶飯齋禱之事司牲養牲視其肥瘠而蠲滌之司牧亦如之

世宗嘉靖三十七年初 命歲遣御史查刷光祿錢穀次年二月閣臣嚴嵩言自設御史查刷之後本寺歲省錢穀二萬一千有奇在直諸臣酒饌每日二金乞寢之上曰法行自近日裁三之二

穆宗隆慶二年光祿寺上言永樂時尚膳監有羊房 景泰中移之西琉璃廠牧地十三頃司牲官吏軍士歲費數千金今請以羊入本司而裁其冗費大監孟冲爭之上從冲言 四年正月吏部覆戶科楊鎔奏請以舉

人出身知縣教官廉能素著者入補光祿寺署正而間以例貢叅之優其超擢或徑于聽選舉人中除補從之

太醫署

按元太醫院不屬太常而別為一衙故另書附見

元 世祖中統元年置宣差提點太醫院事給銀印掌醫事製奉御藥物領各屬醫職不隸太常院 至元二十一年改為尚醫監秩正四品 二十二年復為太醫院給銀印署提點四員院使副使判官各二員 大德五年陞秩正二品設官十六員 至治二年定制院使十二員正二品同知僉院同僉院判各二員經歷都事各一員照磨兼承發架閣庫一員吏不錄所屬八 廣惠司

卿四員少卿二員司丞二員掌修製御用回回藥物及
 和劑以療宿衛士及在京孤寒者經歷知事照磨各一
 員所屬上都大都回回藥物二院秩從五品掌回回藥
 物 至元十九年置 至治二年撥屬廣惠司置達魯
 花赤一員大使二員副使一員 御藥院達魯花赤一
 員大使副使各一員直長一員都監二員掌管各路鄉
 貢諸番進獻珍貴藥品修造湯劑 御藥局至元十年
 始置掌兩都行篋藥餌 大德九年間分立行御藥局
 掌行篋藥物本局但掌上都藥倉之事置達魯花赤一
 員局使副使各二員 御香局提點一員司令一員掌
 修合御用諸香至大元年置 大都惠民局世祖中統

二年置受太醫院劄秩從五品掌收官錢經營出息市
 藥修劑以惠貧民 上都惠民局中統四年置提點司
 令各一員品秩同上 諸路惠民藥局 成宗元貞三
 年置初太祖於燕京等十路置局官給銀五百錠為本
 月營子錢以備藥物擇良醫主之以療貧民世祖末年
 以失陷官本罷之至是依舊例復置皆令各路正官提
 調

胡粹中評曰給醫藥以療貧民之有疾者此愛民之仁
 濟物之義也而出銀為本月營子錢以備藥物則與民
 爭利而有害于仁政矣
 醫學提舉司秩從五品 至元九年置十三年罷十四

年復置掌考校諸路醫生課藝試驗太醫教官校勘名
醫選述文字辨驗藥材訓誨太醫子弟領各處醫學提
舉一員副提舉一員所屬四 官醫提舉司秩從五品
掌醫戶差役詞訟至元二十五年置 大都保定彰德
東平四路提舉司同提舉副提舉各一員 河間大名
晉寧大同濟寧廣平冀寧濟南遼陽興和十路設提舉
副提舉各一員 衛輝懷慶大寧設提舉一員 掌醫
監秩正五品領監官一員達魯花赤一員卿四員少卿
五員太監五員少監六員丞二員 至元三十一年改
典醫爲掌醫署秩五品 至大元年陞監至治三年罷
修合同 藥正司皆秩從五品達魯花赤一員副使

直長各二員掌藥六人掌修合御用藥餌至治三年罷
行篋司藥局秩從五品達魯花赤一員大使副使各
二員掌供奉御用藥餌 至治三年罷已上一監一司
一局俱隸宣徽院 典醫監秩正三品領東宮大醫修
合供進藥餌 至正十九年置達魯花赤二員卿三員
太監少監丞各二員經歷知事各一員吏屬凡十八人
隸詹事府所屬三 廣濟提舉司達魯花赤一員提舉
同提舉副提舉各一員掌修合藥餌以施貧民 典藥
局達魯花赤一員大使副使直長各二員掌修製東宮
藥餌 行典藥局達魯花赤大使副使各二員掌供奉
東宮藥餌

皇明

國初置醫學提舉司改太醫監又改太醫院設院使同知
典簿 洪武十四年定為正五品更設太醫院令丞吏
目御醫如文職授散官 二十二年復院令為院使為
院判 內府又有 御藥房 嘉靖中改為 聖濟殿
本院院使一人院判二人其屬吏目一人御醫十八人
所屬衙門 惠民藥局大使一人副使一人 生藥庫
大使一人副使一人吏九人
院使掌醫療之法院判為之貳凡醫術十三科醫官醫
士醫生專科習業曰大方脉曰小方脉曰婦人曰瘡瘍
曰鍼灸曰眼曰口齒曰接骨曰傷寒曰咽喉曰金鏃曰

按摩曰祝由凡

聖濟殿番直擇術業精通者供事

凡醫家子弟擇師而教之三年試之或五年試之再試
三試而黜陟之 凡藥材辨其土所宜擇其良者而進
焉按摩以消息導引之法除人八疾祝由以呪禁祓除
邪魅之為厲者二科今無傳

世宗嘉靖十五年建

聖濟殿祭先醫之神

事例

凡本院院使判御醫日於

內府

御藥房分兩班輪

直供事

凡醫士俱以父祖世業代補或令在外訪保醫官醫士
以充其精通醫術者本院奏進 御藥房供事

凡收受四方進貢及儲蓄 上用藥品俱於 內府收

掌供用藥餌 國初令醫官就內局修製本院官診視

御脉御醫參看校同會內臣就內局合藥將藥貼連

名封記具本開寫本方藥性治證之法於日用之下醫

官內臣書名以進置簿曆用中書省印合縫進藥奏本

既具隨即附簿年月下書名臣某收掌以憑稽考

凡烹調 御藥本院官與內臣監視每二服合為一服

候熟分為二器其一器 御醫先嘗次院判等次內臣

嘗其一器進 御

凡各 王府差人請醫視疾本院奉 旨差官或醫士

往若文武大臣及外夷酋長有疾亦奉 旨往視其治

疾可否皆具本覆奏或軍中缺醫亦憑總兵巡撫官奏

請撥用

凡醫家子弟舊例選入本院教習醫術弘治五年奏復

行之推堪任教師者二人教習每季考試三年或五年

堂上官一員同醫官二員考試通曉本科者收充醫士

食糧當差未通曉者聽令習學一年再試三試不中者

黜之若五年考試成材者多其教師奏請量加陞授

凡醫士醫生 洪武間各有額數其後增減不一俱於

本院修合藥餌若醫官醫士仍差委各處用藥

東直房 醫士三十六名 安樂堂 醫官二員

司禮監 醫士二名 書堂 醫士二名

乾明門 醫士三名

浣衣局 醫士二名

天壽山 醫士二名

松林靈臺 醫士三名

團營 醫官一員
醫士十二名

神機營 醫官一員
醫士四名

五軍營 醫士三名

三千營 醫士四名

錦衣衛 醫士三名

府軍前衛 醫士三名

惠民局 醫士三名

會同館 醫士三名

大慈恩寺 醫士三名

宣府 醫士一名

紫荊關 醫士二名

居庸關 醫士一名

龍門千戶所 醫士一名

萬全右衛 醫士一名

懷來衛 醫士一名

山海關 醫士一名

廣寧衛 醫士二名

寺子峪 醫士一名

開原 醫士一名

永寧衛 醫士一名

獨石 醫士一名

倒馬關 醫士一名

白羊口 醫士一名

凡醫士食糧月支七斗醫生月支四斗醫官先年月支

二石弘治間照醫士例正支七斗凡各王府缺良醫

從本院推舉醫士送吏部選用

凡本院取充醫役者洪武以來例免原籍民差弘治二

年令御藥房供事者免二丁本院應役者免一丁

凡醫生殘疾及年七十以上不堪應役者放免

凡天下歲辦藥材俱於出產地方派納永樂以後例

共五萬五千四百七十四斤成化以來其數漸增今

共計一十六萬三千五百五十七斤有零蜈蚣蛇六十
 四條蛤蚧天雄二十一對虫蛭木瓜二十箇 浙江布
 政司三萬一千八百五十一斤七兩金箔一百八貼銀
 箔七十二貼 江西布政司七千五百五十六斤一十
 二兩 湖廣布政司四千八百四十九斤七兩七錢二
 分六釐白花蛇九條烏蛇十條 福建布政司二千七
 百六十五斤一兩九錢一分 四川布政司一萬六千
 四百二十斤八兩天雄四對 廣東布政司九千九百
 二十九斤三兩四錢蛤蚧一十七對 廣西布政司九
 千七百二十三斤一十兩 山西布政司八千九百五
 十五斤四錢五分 山東布政司八千七百三十八斤

六兩 河南布政司八千六百四十九斤四兩 陝西
 布政司一萬一千七百四十四斤七兩 遼東都司八
 百斤 應天府三千六百五十八斤八兩 鎮江府三
 千七百一十七斤六兩六錢赤頭蜈蚣四十五條 蘇
 州府一萬八百七十九斤三兩 松江府一千四百四
 十斤 徽州府九百四十九斤八兩 寧國府四千九
 百九十四斤一十兩二錢烏爛虫蛭下木瓜二十箇
 太平府二百八十一斤七兩六錢 池州府六百一十
 三斤 鳳陽府二千七斤 揚州府七百四十五斤三
 兩二錢 淮安府三千一百二十七斤八兩 廬州府
 八十五斤一十二兩五錢九分 安慶府四百五十八

斤七兩 廣德州六百三十斤 滁州一千五百九十
 二斤一十一兩二錢五分 徐州六十三斤六兩二錢
 三分 和州二百二十三斤一十四兩 永平府二百
 一十五斤 隆慶州七百里 保安州七百里 大名
 府一千五十斤 河間府二千一百七十七斤 保定
 府五百斤 真定府七百六十五斤

凡天下解納藥材俱貯本院生藥庫以御醫二員與大
 使一員辨驗收放禮部仍委官一員監收至年終照例
 造冊二本一留本院備照一送禮部查考

凡藥材如丹砂鹿茸等項先用在在外鎮守等官額外進
 貢沿途害人成化二十三年 詔禁止勿進

凡軍中馬病本院給與藥餌

凡天下府州縣舉到醫士堪任醫官者俱從禮部送本
 院考試仍委該司官一員會考中者送吏部選用不中
 者發回原籍為民原保官吏治罪

凡本院合用紙劄俱令府州縣舉到醫士考中者量納
 應用後不行成化十八年奏准仍照舊例

南京太醫院事例

凡本院藥餌俱南京禮部收到湖廣等布政司解來生
 藥製造

凡南京各營該用藥餌俱撥醫士隨病供應

凡醫士醫生俱以世業子弟習學考選分撥各科

凡醫士醫生月糧照太醫院例

衛尉卿

遼之先世未有城郭溝池宮室之固氈車為營硬寨為宮御帳之官不得不謹出于貴戚為侍衛著帳為近侍北南兩部族為護衛武臣為宿衛親軍為禁衛百官番宿為宿直奉宸以司供御三班以肅朝會而硬寨則以嚴晨夜馬

北面侍御司掌御帳親衛之事其官曰侍衛太師曰侍衛太保曰侍衛司徒曰侍衛司空曰侍衛皆貴戚為之其所屬有近侍局官曰近侍直長曰近侍曰小底有近侍詳穩司官曰近侍詳穩曰都監曰將軍曰小將軍

北面護衛府掌北院護衛之事

皇太后宮有左右護衛

官曰北

護衛太師曰北護衛太保曰北護衛司徒其所屬有總

領左右護衛司官曰總領左右護衛有左護衛司官曰

左護衛太保曰左護衛有右護衛司官曰右護衛太保

曰右護衛北面南護衛府掌南院護衛之事官屬皆同

北護衛府 奉宸司掌供奉宸御之事官名未詳 三

班院掌左右寄班之事官曰左班都知曰右班都知曰

寄班都知曰三班抵候 宿衛司專掌宿衛之事官曰

總宿衛事曰總知宿衛事曰同掌宿衛事曰宿衛官

禁衛局掌禁衛之事官曰總禁衛事曰禁衛長 宿直

司掌輪直官員宿直之事官曰宿直詳穩曰都監曰將

軍曰小將軍曰宿直官曰宿直護衛 硬寨司禁圍槍
寨下鋪傳鈴之事官曰硬寨太保

南面衛尉寺官曰衛尉寺卿曰衛尉寺少卿曰衛尉寺
丞曰衛尉寺簿

金 衛尉司 大安元年擬隆 慶宮人數定之 中衛尉從三品掌總中宮事

務副尉從四品左常侍從五品掌周護道從儀仗之事

右常侍從五品常侍官護衛三十人 同東宮 奉引八十人

同儀 給事局使正七品副使正八品

內謁者兼司寶二員從六品 內直 奉閣一十人 同東閣

底閣直二十人 同宮闈 掖庭局令從九品 內直 掌皇后

宮事務丞從九品 內直 宮令 宮苑司儀 食官 尚食 飲官

尚藥局大 醫官 醫醫院兼 主藏 內藏典 主廩 太倉

元世祖至元二十年立衛尉院改軍器監為武備監隸衛
尉院二十四年罷院立太僕寺遂不置

皇明

凡供奉儀仗導從諸務俱屬錦衣衛不設此官而 中宮

內謁等職則詳于內侍省

宗正卿

宋 寧宗嘉定九年十二月以宗學隸宗正寺

理宗寶祐三年二月詔令宗正少卿歲舉宗學官選人一

員六年四月詔與芮判大宗正寺

遼北面大惕隱司太祖神冊二年置掌皇族之政教官名

曰惕隱又名梯曰知惕隱司事曰惕隱都監 興宗重

熙二十二年耶律義先拜惕隱戒族人曰國家三父房

最為貴族天下風化所自出不孝不義雖小不可為其

妻晉國長公主之女每見中表必具禮服義以身率先

國族化之 南面宗正寺職在大惕隱司

金 大宗正府泰和六年避睿宗諱改為大睦親府判大

宗正事一員從一品以皇族中屬親者充掌敦睦糾率

宗屬欽奉王命馬泰和六年改為大睦親寺同判大宗

正事一員從二品泰和六年改為同判大睦親寺同簽

大宗正事一員正三品宗室充之大定元年置泰和六年改

同簽大睦親寺大宗正丞二員從四品一員選宗室中

能卓者一員不限親疎分司上京長貳兼管治臨潢以

東六司屬泰和六年改為大睦親寺丞知事一員從七

品檢法從八品諸宗室將軍正七品上京東澤忒二處

皆有之世宗時始命遷官其戶凡百二十明昌二年更

名曰司屬設令丞 承安二年以令同隨朝司令正七

品丞正八品中都上京扎里瓜合右西南梅堅塞蒲與

臨潢泰州金山等處置屬大宗正府

元 大宗正府秩從一品初未有官制首置斷事官會決

庶務凡諸王駙馬投下蒙古色目人等應犯一切公事


及漢人奸盜詐偽蠱毒魘魅誘掠逃驅輕重罪囚及邊

遠出征官吏每歲從駕分司上都存留住冬諸事悉掌

之 至元二年置十員三年置八員九年降從一品銀
 印止理蒙古公事以諸王為府長餘悉御位下及諸王
 有國封者又有怯薛人員奉旨署事別無頒受宣命十
 四年置十四員二十一年置二十一員二十二年增至
 三十四員二十八年增至四十六員 大德四年省五
 員 皇慶元年省二員以漢人刑名歸刑部 泰定元
 年復命兼理置札魯忽赤四十二員令史改為掾史
 致和元年以上都所屬蒙古人并怯薛軍站色目與漢
 人相犯者歸宗正府處斷其餘路府州縣漢人蒙古色
 目詞訟悉歸有司

按世祖至元二十二年哈刺哈孫由掌宿衛拜太宗正
 用法平允時欲以江南獄隸宗正哈刺哈孫曰江南新
 附教令未孚且相去數千里欲遙制其刑獄得無冤乎
 事遂止

趙天麟上言國家既立宗正府又立國子監蓋欲申邦
 憲以公滅私崇德化以文飾質然其宗室罕篤於學或
 月誦而年閱或春集而秋散以馳馬試劍為至樂以援
 弓射鴻為常事迹其生於深宮之中長於婦人之手太
 倉精粒為之食御局綾錦為之衣左庫之錢供其費用
 下民之力給其役使夏不知暑冬不知寒不知稼穡之
 艱難不聞小人之勞苦願指氣使而左右趨風叱咤搗
 詞而鬼神驚懼視公侯之爵輕若織塵俯望重之賢皆



出已下有酒如澗有肉如陵目厭於姬姜之艷耳喧於
絲竹之聲真堯率之天人蓬萊之仙子處貴而不自知
其貴宜驕而不自知其驕中人以下鮮有弗移其性者
伏望陛下導宗室以學問激宗室以榮名嚴宗室之師
重宗室之友庶使貴人之志各懷希聖之明心毋令博
士之流謾作在公之虛號若然則東平最樂克廣於今
河間道術不能專美矣

皇明

太祖洪武己巳春正月丙戌改大宗正院為 宗人府遂
定官制初洪武三年置大宗正院正一品至是改為宗
人府設令一人正一品左右宗正左右宗人俱各一人

從一品其屬經歷一人正五品是年 命 秦王為宗
人令 晉王 燕王為左右宗正 周王 楚王為左
右宗人故至今署府者不由中門後以勳戚大臣攝府
事不備官會典云本府所領 宗室重事故品秩特序
文職之首

按孫清 宗人府題名記云 太祖高皇帝建 宗人
府以至睦宗親族之事制以 親王之長領府事其次
則 宗人令左右宗人正左右宗人皆正一品以勳舊
大臣佐之 王牒派演金枝廣疎立嫡請名章奏文移
必關歷而後行焉故 宗人府列諸司之首載在 祖
訓及 大明官制甚詳 洪武年間沿革不可備考



永樂初 太宗文皇帝建都北京 宗人府為行在
命駙馬都尉永春侯王寧署府事而宗人正宗人諸員
皆設 洪熙宣德間 皇親武定侯郭玘專署事 正
統三年始建府治吏部之北在東公生門之南革去行
在二字以駙馬都尉西寧侯宋璞掌之自是遂為定
制宗人令掌 皇九族六親之屬籍以時修其 玉牒
書 宗室子女適庶名封生卒婚嫁謚葬凡 宗室陳
請為之上達及定其才能罪過以聞左右宗正宗人為
之貳經歷典出納文移

崇玄署 崇玄者北齊初掌佛教唐玄宗崇祀老子以尊
其祖而後世因以崇道教然猶隸之宗正者
始本以崇祖也元人崇釋事
附之以其事象故特列于此

金 北太乙宮管勾一員正八品掌守宮繕修之事

元

世祖至元十七年立都功德使司掌奏濟師所統僧人秩
從二品 二十一年立衍福司職四品使同知副使各
一員 二十六年立崇福司掌領馬兒哈昔列班也里
可溫十字寺祭享等事 仁宗延祐二年改為院置領
院事一人省併天下掌教司七十二所以其事歸之
七年復為司置司使四人從二品同知二人從三品副
使一人從四品司丞二人從五品經歷知事照磨各一
人

王宗沐曰佛之入中國其蠹政害民甚矣崇奉而信之

者莫如蕭梁姚秦之間議者猶爲其足以自亡然亦何嘗至此極哉元人本以夷狄入主中原其政治純夷固無足憾至帝師之設則壞亂極矣取番僧一人最黠者奉以爲師其令命與帝勅並行于西土雖帝后妃主皆因受戒而爲之膜拜正衙朝會百官班列而帝師亦或專席于坐隅且每帝即位之始降詔褒護必勅章佩監絡珠爲字以賜其未至而迎之則中書大臣馳驛累百騎以往所過供億送迎比至京師則勅大臣假法駕半仗以爲前導詔省臺院官以及百司庶府並服銀鼠質孫用每歲二月八日迎佛威儀往迓且命禮部尚書郎中專督迎接及其卒而歸葬舍利又命百官出郭祭餞

大德九年專遣平章政事鐵木兒乘傳護送賻金五百兩銀千兩幣帛萬疋鈔五千錠 皇慶二年加至賻金五千兩銀一萬五千兩錦綺雜彩共一萬七千疋雖其昆弟子姓之往來有司亦供億無乏泰定間以帝師弟公哥亦思監將至詔中書持羊酒郊勞而其兄瑣南藏卜遂尚公主封白蘭王賜金印給員符其弟子之號司空司徒國公佩金玉印章者前後相望爲其徒者怙勢恣睢日新月盛氣焰薰灼延于四方爲害不可勝言而前後諸臣剛如伯顏廉希憲正如許衡眷如劉秉忠諸人卒無一人敢言其非者豈天子崇信之過使之操生殺禍福蕃掌之間而諸臣亦各保身全家不敢救藥

乎終元之世夷風薰塞于宇內天厭腥穢以速其亡生
人之阨天道之爽將爾適然其亦有開焉以爲之資乎
宣政院古無之元立掌釋教僧徒及吐蕃之境而隸治之
遇吐蕃有事則爲分院往鎮亦別有印如大征伐則會
樞府議其用人則自爲選其爲選則軍民俱攝僧俗並
用 至元初立總制院而領以國師世祖至元二十五
年因唐制吐蕃來朝見於宣政殿故更名宣政院置院
使十員從一品同知二員正二品副使二員從二品僉
院二員正三品同僉二員正四品院判三員正五品叅
議二員正五品經歷二員從五品都事二員從七品照
磨一員管勾一員並正八品吏史不一其屬九其理叶

蕃有元帥府安撫招討宣慰司等別具 斷事官四人
經歷知事各一人至元二十五年置 客省使大使二
人副使一人置同 大都規運提點所達魯花赤一人
提點一人大使副使各一人 上都規運提點所設官
同俱至元二十八年置 大都提舉資善庫達魯花赤
一人提舉同提舉副提舉各一人掌錢帛之事至元二
十六年置 上都利貞庫提領一人副使一人掌飲膳
等事金銀諸物元貞元年置 廣濟倉監支納大使各
一人 崇教寺營房提領一人
行宣政院順帝元統二年革罷廣教總管府十六處置行
宣政院於杭州除院使同知副使各二人同僉院判各

一人 至元二年西番寇起又置行宣政院以也先帖木兒爲院使往討之 至正二年江浙行宣政院又設崇教所擬行中書省理問官以理僧民之事

大禧宗禋院古無元置秩從一品掌神御殿歲時朔望諱忌日辰禋享禮典 天曆元年罷會福殊祥二院改置大禧院以總制之初院官秩正二品陞從一品置參議二員改令史爲掾史二年改大禧宗禋殿置院使六員增副使二員立諸總管府爲之屬凡錢糧之出納營繕之作輟悉統之定置院使都典制神御殿事六員同知兼佐儀神御殿事二員副使兼奉贊神御殿事二員僉院兼祇承神御殿事二員同僉兼肅治神御殿事二員

院判供應神御殿事二員參議二員經歷二員都事二員管勾照磨各一員所轄五

隆禧總管府秩正三品 武宗至大元年初建南鎮國寺立規運提點所後改所爲隆禧總管府置達魯花赤一員副達魯花赤一員同知一員治中一員判官一員經歷一員知事照磨各一員所屬七 福元營繕司秩正五品達魯花赤一員司令一員大使一員副使一員吏目一員司吏一人 天曆二年以南鎮國寺所立怯憐口事產提舉司改爲崇恩福元提點所三年又改福元營繕司 普安智金營繕司秩五品設官同上 天曆元年以大玉山普安寺大智金寺兩規運提點所并

為一置提點二員至三年又改為營繕司 祐國營繕
都司秩五品設官同上惟增知事一員提控案牘一員
天曆元年初置萬聖祐國營繕提點所至三年又改
為營繕都司 平松等處福元田賦提舉司秩五品置
達魯花赤一員提舉一員同提舉副提舉各一員 田
賦提舉司秩五品設官同上但無達魯花赤 資用庫
提領一員大使一員 萬聖庫提領一員大使副使各
一員
會福總管府秩正三品 至元十一年建大護國仁王
及昭應宮始置財用規運所秩正四品十六年改運所
為總管府 至大元年改都總管府從二品尋陞會福

院置院使五員 延祐三年陞正二品 天曆元年改
為會福總管府正三品定置達魯花赤一員總管一員
同知一員治中一員府判一員經歷知事提控案牘各
一員所屬五 仁王營繕司正五品 至元八年立護
國仁王寺鎮遏提舉司十九年改鎮遏所二十八年并
三提領所為諸色人匠提領所 天曆元年改為鎮遏
民匠提領所三年改為仁王營繕司置達魯花赤一員
司令一員大使副使各一員 會福財用所秩從七品
掌大護國仁王寺糧草諸物 至元十七年始立財用
庫二十六年立盈益庫 天曆元年并財用盈益為所
置提領一員大使一員副使二員

崇祥總管府秩正三品 至大元年始立大承華普慶寺都總管府二年改延禧監尋改崇祥監四年陞崇祥院秩二品 泰定四年復改爲大承華普慶寺總管府天曆元年改崇祥總管府定置達魯花赤總管副達魯花赤同知治中府判各一員經歷知事提控案牘兼照磨各一員所屬八 永福營繕司秩正五品 延祐三年以起建新寺始置營繕提點所 天曆元年改永福營繕提點所三年改營繕司設達魯花赤司令大使副使都目各一員 昭孝營繕司秩正五品 天曆元年立壽安山規運提點所三年改昭孝營繕司定置達魯花赤司令大使副使各一員 普慶營繕司 天曆

元年置普慶營繕提點所三年改營繕司置官同上 崇祥財用所 至大二年始置諸物庫四年置普贍倉 天曆二年併諸物庫普贍倉改爲崇祥財用所設提領大使副使各一員 永福財用所掌出納顏料諸物 延祐三年始置諸物庫又置永積倉 天曆二年以諸物庫永積倉併改置爲所設提領大使副使各一員 隆祥使司秩正三品 天曆二年中宮建大承天護聖寺立隆祥總管府設官八員 至順二年陞爲隆祥使司秩從二品置官司使四員同知副使司丞各二員經歷一員都事二員照磨兼架閣一員令史十人所屬十 普明營繕都司秩正四品 天曆元年朔大龍興普

明寺于海南置規運提點所設官六員二年撥隸隆祥
總管府三年改爲都司品秩仍舊以掌管繕出納錢糧
之事定置達魯花赤司令大使副使各一員知事一員
提控案牘一員 集慶萬壽營繕都司秩正四品 天
曆二年建龍翔萬壽寺于建康立龍翔萬壽營繕提點
所爲隆祥總管府屬三年改爲營繕都司秩仍舊以掌
管造錢糧之事設官同上 元興營繕都司秩正四品
掌管造錢糧之事 天曆元年始置 大元興規運提
點所置官五員三年改都司置官同上 宣農提舉司
秩從五品達魯花赤提舉同提舉副提舉各一員掌徵
收田賦子粒之事 天曆二年以大都等處田賦提舉

司隸隆祥總管府三年改提舉司 護聖營繕司秩正
五品達魯花赤司令大使副使各一員掌管造工匠寺
僧衣糧收徵房課之事 天曆二年始立大承天護聖
營繕提點所三年改爲司 平江善農提舉司秩從五
品達魯花赤提舉同提舉副提舉各一員 天曆二年
立田賦提舉司設官四員二年改爲善農提舉司 善
盈庫天曆二年隸隆祥總管府置提領一員大使副使
各一員掌金銀錢糧之事 荆襄等處濟農香戶提舉
司秩正五品 天曆三年以荆襄提舉司所領河南湖
廣田土爲大承天護聖寺常住改爲荆襄濟農香戶提
舉司隸隆祥總管府置達魯花赤司令同提舉副提舉

各一員 天曆二年置掌隆慶州所有土田歲賦 平
江集慶崇禧田賦提領所提領同提領副提領各一員
天曆三年置 集慶崇禧財用所大使副使各一員天
曆三年置

壽福總管府掌祭供錢糧之事秩正三品 至大四年
因建大聖壽萬安寺置萬安規運提點所秩正五品
延祐二年陞都總管府秩正三品尋陞爲壽福院正二
品 天曆元年改立總管府仍正三品定置達魯花赤
總管副達魯花赤同知治中府判各一員經歷知事案
牘照磨各一員所屬五 萬寧營繕司秩正四品 大
德十年始置萬寧規運提點所 天曆元年改營繕司

定置達魯花赤司令大使副使都目各一員 收支庫
提領一員大使一員 延聖營繕司秩正五品初立天
源營繕提點所 天曆三年改營繕司設官同萬寧司
諸物庫提領一員大使一員

順帝至元六年罷大禧宗禋院隆祥使司中書奏以宗禋
院所轄會福崇祥隆禧壽福四總管府併隆祥使司俱
改爲規運提點所正五品仍添萬壽提點所並隸宣政
院 至正元年依世祖故事復立司禋監給四品印掌
師翁祭祀祈禳之事置內監少監二人監丞二人知事
一人後復陞爲三品

皇明

國初不設崇玄宣政等院但置僧錄司道錄司官 洪武
 元年置善世院以僧慧曇掌釋教事置玄教院以道士
 經善悅為真人領道教事四年革明年改僧錄為司僧
 凡三等曰禪曰講曰教設左右善世左右闡教左右講
 經左右覺義各一人司置于天界寺道凡二等曰全真
 曰正一設左右正一左右演法左右至靈左右言義司
 置于朝天宮二司官俱正六品又天下府置僧綱司都
 綱道紀司都紀皆從九品副皆未入流州置僧正司僧
 正道正司道正縣置僧會司僧會道會司道會俱未入
 流並朝除不給俸凡該處僧道各統於所司在京二司
 屬禮部其僧道常任不許典賣著為令道錄凡 朝朔

班 西墀慶賀頒 詔班 東墀祭祀不得預三茅

山又有靈官副靈官龍虎山有真人洪武初張天師四
 十二代孫正常以正一主教天師來朝 太祖曰 天
 豈有師乎 賜正一嗣教道合無為闡祖光範真人領
 道教事秩正二品仍 賜以正一玄壇之印印如二品
 制凡高士道士以術幸者 賜號高士真人 五年度
 僧道五萬七千二百人禮部言往代度牒鬻錢資 國
 用名免丁錢 上命罷之著為令 七年禁度尼姑女
 冠 二十四年 勅清理釋道曰佛本異教漢時至自
 西域當時士民崇敬後有去髮合兒童出家者其修
 行云色相絕嗜慾潔身為善道教始老子至漢張道陵

以異術役召鬼神禦災捍患二教立世久不磨滅者以此今學佛老者皆不循其本俗妨教敗行爲害甚大自今天下僧道凡各府州縣寺觀雖多但存一寬大所併居之母淆處民間願還俗者聽佛經番譯已定毋得增減道士設齋醮毋拜奏青詞爲孝子慈孫演誦經典報祖父母父母者各遵 頒降科儀毋妄立條章索民財民有做瑜珈教稱善友假張真人私造符籙者並重治二十八年今天下僧道赴京考試不通經典者黜之今上萬曆元年 詔禁革萬壽廣善二壇僧人戒法 四年題准道士差遣各 陵寢祭告者止穿本等服色不許假稱太常寺僧乘輿輿及香帛木匣之外多用人夫

致擾驛遞

五年仍准復真人名號

續文獻通考卷之九十一終

續文獻通考卷之九十二

皇明進士雲間王圻纂輯

職官考

太僕大理鴻臚司農秘書司天將作

太僕寺

附行大僕寺苑馬寺

遼南面太僕寺卿曰太僕寺少卿曰太僕寺

丞曰太僕寺主簿 南面有乘黃署 北面有飛黃院

官曰飛龍使曰飛龍副使 典廐署北面有尚廐司官

曰尚廐使曰尚廐副使有總領內外廐馬司官曰總領

廐馬 諸牧監北面有西路群牧使司有倒塔嶺西路

群牧使司有渾河北馬群司有漠南馬群司有漠北滑

水馬群司有牛群司其設官曰其群太保曰其群侍中

曰其群敝史皆同又有總典群牧使司其官曰總典群牧部籍使曰群牧都林牙所屬有群牧司其官曰群牧使曰群牧副使

金不置太僕寺而尚廐局屬殿前都提點司提點正五品使從五品副使從六品掌御馬調習牧養以奉其事定

二十九年添副使一員管小馬群直長一員司馬牛群掌廐都轄正九

品不限員數資考諸群牧所國言謂烏魯古

提控諸烏魯古一員正四品明昌四年置是年以安遠大將軍尚廐

局使石抹貞兼慶州刺使為之設使一人從四品國言作鳥

魯古副使一員從六品掌檢校群牧畜養蕃息之事判

官一員正八品掌僉判本所事知法一員從八品 典

以貞祿時置使正七品副從八品判官正九品 圍

牧司與定二年置使正七品副正八品判官正九品

提舉圍牧所泰和三年隸各路統軍司 河南東路河

南西路陝西路皆設提舉同提舉山東路止設提舉

元制太僕寺秩從二品掌阿塔思馬匹受給造作鞍轡之

事世祖中統四年設群牧所至元十六年改尚牧監十

九年又改太僕院二十年改衛尉院二十四年罷院立

太僕寺又別置尚乘寺以管鞍轡而本寺止管阿塔思

馬匹二十五年隸中書置提調官二員武宗大德十一

年復改太僕院武宗至大四年仍為寺卿二員從二品

少卿二員從四品丞二員從五品經歷知事照磨管勾

各一員 典牧監文宗天曆二年置秩正三品卿二員
太監二員少監二員丞二員經歷知事照磨各一員吏
屬凡十二人掌孳畜之事屬詹事院 群牧監秩正二
品掌中宮位下孳畜隸徽政院卿二員太卿少卿監丞
各二員至大四年立至治三年罷

皇明

國初仿古置太僕寺以江北諸郡縣限于長江馬至京難
又滌介江淮多山山下故多曠土饒薦草莽水泉利可
牧故于 洪武六年設寺于滁卿品從三又置少卿二
人正四品分寺丞等官專掌牧馬之事領滁陽等八監
蕭縣等十八羣 二十八年省牧監屬有司置管馬官

于是各處馬匹印烙點視悉至滁及 永樂十九年定
鼎北京設太僕寺于滁去南京二字 洪熙元年于北
京仍稱行在于滁去南京二字 正統六年復永樂十
九年之舊于是順天等府及山東河南馬政悉屬于北
惟兩淮及江南北仍屬南京 弘治四年屬于南者印
烙不至滁而悉總于北

太祖洪武初定太僕寺官初名群牧所至是始定正卿一
人從三品少卿三人正四品寺丞八人正六品監正正
七品監副正八品主簿一人從七品苑圍長從九品錄
事未入流掌牧馬之事衙門設於滁州 永樂元年改
北平行太僕寺爲北京行太僕寺 四年置苑馬寺于

陝西甘肅遼東正卿一人正三品少卿二人正四品寺丞無定員正六品其屬主簿監牧監正監副錄事圍長各一人六年又設北京苑馬寺領六監二十四苑十六年革馬歸北京行太僕寺牧民間凡領府衛州縣三百六十八年改太僕寺洪熙元年復稱北京行太僕寺正統六年復定爲太僕寺云初建文中改卿爲太僕卿增典廐典牧二署設驕驥十五群遂生三群分隸二署靖難後復故

太僕寺卿一人少卿三人寺丞八人其屬主簿一人常盈庫大使一人吏二十二人

卿掌牧馬之政令而聽於兵部少卿寺丞爲之貳少卿一人佐寺事一人督管馬一人督畿馬寺丞分理京衛畿府及山東河南六郡孳牧寄牧三年更凡牧人皆視其丁產而授馬馬蠲其役賦之則凡孳牧軍民皆有種馬馬有牝牡十二牝十八五歲徵馬一曰備用馬齊其馬力以給京邊將士將士足寄牧於畿府土非所宜及人民耗散或征馬金輸兵部市馬凡馬肥瘠登耗籍其毛齒而時省之三歲偕御史一人印烙選其良健而汰其羸劣凡草場歲徵其租金災稔出佐牧人市馬凡租金恩蠲或災蠲馬及馬金災蠲不得恩蠲即蠲必轉移相抵不得虧軍賦主簿勾省文移常盈庫貯馬金行太僕寺洪武三十年置山西北平陝西遼東三處

寺置卿一人少卿一人寺丞無定員其屬主簿一人

卿掌馬牧之事而聽於兵部少卿寺丞為之貳凡邊衛

營堡府州縣軍民壯騎操馬印烙課校孳牧以時督察

之凡馬種牡十二牝十八馬金地畝十七椿朋十三凡

馬瘠耗罰俸罰馬降級出革懲董之藩臬不得預馬事

考馬官苑馬寺亦如之主簿典守籍牒

苑馬寺 永樂四年置於陝西甘肅六年又置於北平

十六年并入行太僕寺遼東亦有苑馬寺

寺置卿一人少卿一人寺丞無定員其屬主簿一人各

監牧監正一人監副一人隸事一人圍長一人

卿掌馬牧之事而聽於兵部少卿寺丞為之貳凡馬種

上苑萬匹中苑七千下苑四千不及則以銀市茶易馬

凡牧地曰草場曰荒地曰熟地嚴其禁令而封表之凡

牧人曰恩軍曰隊軍曰改編之軍曰充發之軍曰召募

之軍曰抽選之軍皆藉而食之凡馬駒二年一科十八

年而免定駒頭駒重駒籍而報之有常期凡虧駒有罰

主簿如行太僕寺監正領苑監之事監副佐之隸事守

籍牒圍長率群長而修牧事

事例

穆宗隆慶二年七月吏部議覆陝西撫臣張祉言苑馬寺

行太僕寺均有圍牧之責二寺正卿徃自叅政陞補今

則叅政有自二寺卿遷轉者惟是一倒置之間而事權

則叅政有自二寺卿遷轉者惟是一倒置之間而事權

日輕人心懈弛馬政日趨于廢乞自今仍以叅政及年深副使推補果有異績亦照先年都御史車震事例擢之不次以重事權報可 五年六月掌吏部事高拱言行太僕寺苑馬寺專理馬政鹽運司專理鹽政皆國家要務所關非閑局也而近來視之甚輕卽卿與使類以考不稱職有物議者充之夫既不稱職有物議矣則黜退可也柰何以是爲安置之所哉遂至奸貪苟且政務廢弛殊非 祖宗設官初意今宜破除常套凡卿員缺必以廉謹有才望者推補而又定其階格卿視布政司叅政視按察司副使俟政成之後一體陞選若有卓異卽當超擢如 先朝故事 上亦以馬政益法國家重務必重其官乃可以責實効 命如拱議舉行 九月吏部覆御史褚鈇奏請裁革陝西行太僕寺苑馬寺寺丞各增設少卿一員與本寺卿俱兼按察司僉事職銜分理中東西三路以藩臬有才望者充之長樂靈武監正以舉人選補錄事圍長亦當授北方諳于養馬者令其專心罔政止聽巡茶御史鈐束其他撫按衙門毋得干預從之

大理寺

遼南面大理寺官曰大理寺卿曰大理寺少卿曰大理寺丞曰大理寺主簿外有提點大理寺有大理正 金大理寺天德二年置自少卿至評事漢人通設六員女

直契冊各四員卿正四品少卿從五品大理正正六品
 丞從六品掌審斷天下奏案詳讞疑獄司直四員正七
 品掌參議疑獄披詳法狀舊有契冊司直一員明昌二年罷評事三員
 正八品掌同司直明昌二年省契冊評事二員大安二年省漢人一員知法十一
 員從八品女直司五員漢人司六員掌檢斷刑名事明法二員從八
 品興定二年置同流外四年罷之

元世祖至正二十二年陞大理寺為都護府秩正二品至
 大四年置經正監掌管盤納鉢及標撥投下草地有詞
 訟則治之本卿二員正三品太監二員從三品少監二
 員從四品監丞二員正五品經歷知事各一員卿太監
 少監並奴都赤為之監丞流官為之

太祖吳元年初置大理寺正三品衙門設卿少卿丞評事
 洪武元年革 三年置磨勘司有令左右丞凡諸司
 刑名錢糧有寃濫隱匿者稽其功過以聞 十四年復
 置大理寺始改為正五品衙門其屬置二寺設左右寺
 正左右寺副左右評事時翰林待制吳沉言刑寃濫請
 增審獄官於是又設審刑司屬寺凡刑部十三道五軍
 斷事官按囚覆問移審刑司評駁是非 十七年改建
 刑部都察院大理寺審刑司五軍斷事官署於太平門
 外名其所曰貫城 十九年罷審刑司 二十三年復
 陞正卿三品與六部都察院通政司並 二十六年設

司務 二十九年復革案牘盡移後湖 三十一年九月建文君復置改寺爲司卿爲大理卿左右寺正爲都評事寺副爲副都評事司務爲都典簿靖難後盡革建文官制 永樂初復爲寺設官仍舊 十九年定鼎北京革行在於留都加南京二字 洪熙元年復稱行在於留都革南京二字 正統六年復永樂十九年之舊仍革行在二字定爲大理寺於留都仍加南京二字以別之然大理寺自永樂十九年以後凡天下刑名罪有出入者審駁悉歸於此委任視南尤重

成祖永樂中定設大理寺卿一人左右少卿各一人左右寺丞各一人其屬司務二人左右二寺各寺正一人寺

副一人評事四人監生三十二人吏三十五人

卿掌審讞凡反刑獄之政令少卿寺丞爲之貳凡刑部十三道推問刑名按律例讞而復問其狀款服則決之否則駁訊必服乃決每歲會九卿朝審重囚凡錄囚徒會刑部都察院司務典出納文移左右寺分理京畿十三省刑名之事凡刑部十三道問理刑名據其由狀訊其人合律例若囚服准擬若否駁再擬改正日照駁三擬不當糾問官曰叅駁牾律寃甚者移調問曰番異再異則請下九卿會問曰圓審凡已評允而尤未當者移再問曰追駁凡屢駁不改者徑請發落曰制決凡各省三司直隸死刑並讞已乃聽決按察司巡按巡撫惟死

刑呈部院轉讞凡笞杖罪移審徒流以上奏審凡律例無正條上下比請曰類奏平反刑獄狀南京有重囚平審而類奏亦如之

卿一人正三品左右少卿各一人正四品左右寺丞各一人正五品其屬左右寺正各一人正六品左右寺副各一人從六品左右評事四人正七品司務二人從九品掌審錄天下刑名有冤枉者 丘文莊曰刑部都察院大理寺主執法又謂之三法司大理之設則自兩法司所聽斷日抱成索引囚徒詣寺詳讞寃者疑者情輕重者皆得一一據律叅駁必求之當然後月報歲聞於上請施行之其職亦重且要哉

鴻臚寺

典客署

遼南面有鴻臚寺官曰鴻臚寺卿曰鴻臚寺少卿曰鴻臚寺丞曰鴻臚寺主簿

北面客省局官曰客省局使曰客省局副使

總器物人醫獸醫三

局設都南面客省局林牙大宗會同元年置官曰都客省口

客省使曰左客省使曰右客省使曰客省副使所屬有四方館官曰四方館使曰四方館副使有引進使司官曰引進使有點簽司官曰同點簽使事有禮信司官曰勾當禮信司有禮賓使司官曰禮賓使其上京東京各置客省司官曰省使曰省副使

金以鴻臚寺分屬宣徽院客省引進閣門諸使而鴻臚寺

不設外有四方館使正五品副使從六品掌提控諸路驛舍驛馬并陳設器皿等事屬尚書兵部

元以禮部會同館掌接伴引見諸番蠻夷峒夷之來朝貢者以通政院廩給司掌諸王諸番各省四方邊遠使客飲食供張等事而鴻臚寺不設

皇明

國初置侍儀司為從六品衙門職專朝儀宣贊等事 洪

武九年改為殿庭禮儀司設使副承奉鳴贊序班 十

三年革承奉添設司儀 九年更使為司正副為左右

司副左右司丞 三十年始改鴻臚寺陞正四品衙門

定設卿少卿丞首領為主簿其屬有司賓署丞司儀署

丞鳴贊序班後又設外夷通事亦隸焉 永樂十九年

定鼎北京在留都者加南京二字但南京正卿類用科

目出身而在北者多以監生選鳴贊出身累資陞正卿

隆慶元年例正卿仍用科目出身者推陞

鴻臚寺卿一人左右少卿各一人左右寺丞各一人其

屬主簿一人司賓司儀署各署丞一人鳴贊八人序班

五十四人吏八人

卿掌朝會賓客吉凶禮儀之事少卿寺丞為之貳凡日

朝朔望朝大朝會宴享經筵進曆進春 冊封祭祀傳

制奏捷百官四夷見謝辭率其屬而供事焉主簿典

出納文移司賓典四夷朝貢首渠領從辨其等而教其

拜跪之節司儀典陳設引奏禮儀皆丞領之鳴贊贊禮
凡內贊通贊對贊接贊傳贊各供其事序班侍班齊班
糾儀引人舉案及傳贊

穆宗隆慶四年吏部覆郭諫臣奏太常鴻臚禮樂之司今
正卿宜仍用進士令其參酌禮儀約束官屬其別途出
身者太常寺至少卿而止鴻臚寺至少卿而止秩滿
之日止許加俸

司農卿

遼南面有司農寺官曰司農卿曰司農少卿曰司農丞曰
司農主簿 上林署遼北面有監鳥獸詳穩司官曰監
其鳥獸詳穩曰監其鳥獸都監曰監其鳥人曰監其獸

人

金勸農使司泰和八年罷貞祐間復置興定六年罷勸農
司改立司農司使一員正三品副使一員正五品掌勸
課天下力田之事其司農司兼採公事者大司農一員
正二品卿三員正四品少卿三員正五品知事二員陝
西并河南三路置行司農司設官五員正大元年歸德
許州河南陝西各置卿一員正四品少卿一員正五品
丞一員正六品卿以下迭出巡按察官吏臧否而黜陟
之使節所過奸吏屏息十年之間民政修舉實賴其力
上林署屬工部官曰上林署提點從五品泰和八年
朔大安二年省令從六品掌諸苑池沼種植花木菓蔬

及承奉行幸舟船事丞從七品大定七年增一員分司南京以勾判兼之大安
三年復直長二員正八品

元

世祖至元七年始置大司農司秩正二品凡農桑水利學校饑荒之事悉掌之置官五員 十四年罷以按察司兼領勸農事 十八年改立農正院置官六員 二十年又改立務農司秩從三品 二十三年仍為大司農司秩仍正二品 仁宗皇慶二年陞從一品定置大司農四員從一品大司農卿二員正二品少卿二員從二品大司農丞二員從二品經歷一員從五品都事二員從七品架閣庫管勾一員照磨一員並正八品

上林署秩從七品 至元二十四年置署令署丞各一員直長一員掌宮苑栽植花卉供進蔬菓首畜以飼馳馬備煤炭以給營繕隸大都留守所屬有養種園花園首畜園等職

道官署元之供膳司畧同秩從五品掌供給應需貨買百色生料并桑哥籍入貨產 至元二十二年始置隸司農置達魯花赤提點各一人司令一人丞一人所隸官司三 輔用庫秩正九品掌規運息錢以給供需置大使副使各一人 興中州等處油戶提領所秩從九品 至元二十九年置歲辦油十萬斤以供內庖置提領一人使同輔用庫 蔚州麵戶提領所掌辦白麵葱

萊以給應辦歲計十萬餘斤置提領副使各一人
諸屯監元世祖至元十八年置屯田打捕總管府于延
安設達魯花赤一人秩從三品管析居放良人戶并兀
思吉思田地北來蒙古人戶總管同知各一員屬官一
十二人又置屯田打捕所于北京設達魯花赤一人秩
從七品掌平灤等路析居放良不闕遺等戶長官一人
蒙古教授儒學教授各一人 至元二十四年立屯田
總管府于永平路置達魯花赤一人總管同知知事各
一人所轄昌國濟民豐贍三署各置令丞直長各一人
順帝至元四年陞兩淮屯田打捕總管府爲正三品 至
正十年置河北江南都總制庸田使司其屬有屯田總
管府凡五 十五年置軍民屯田使司于沛縣正三品
各路又有屯田萬戶府所置不一所領亦不專司農泐
也 籍田令世祖至元七年始立秩從六品掌耕種籍
田以奉宗廟祭祀隸大司農 十四年罷司農隸太常
寺 二十三年復立大司農司仍復隸馬署令一員從
六品署丞一員從七品司吏一人 時趙天麟上言聖
朝若稽古道既立司農司又令臨民官兼管內勸農事
凡以當務之爲急也伏望陛下軫於睿慮重此農桑躬
耕籍田后親蠶以先之凡農家之孝弟力田者鄉三老
其實舉之免其人當年所耕田租稅之半凡民特富無
他故而有田不耕有桑不蠶者鄉三老其實舉之就於

當年倍科其閑田之租稅凡民老幼有田不能耕有桑不能蚕者令下之後限一年須要顧停客戶完置牛具違限者如無故不耕蠶之例凡勸農官管內有田桑無故不耕蠶者委廉訪司察勸農官而罰之凡逃戶田桑令下之後限一年官爲召人耕蠶違限則委廉訪司察勸農官而罰之凡勸農官皆可自具飲食若以後復有騷擾農家者委廉訪司察之如受賄之罪罪之如是則官皆慎勸民皆力耕男有餘粟女有餘帛矣

行大司農司秩二品設勸農營田司六秩四品使副各二員隸行大司農司

分司農司元順帝至正十三年立先是脫脫言京畿

近水地利召募江南人耕種粟麥可收歲百萬餘石不煩海運京師足食於是立分司農司以右丞悟良哈台左丞烏古孫良禎兼大司農卿給分司農司印西自西山南自保定河間北抵檀順東及遷民鎮凡官地及元管各屯田悉從分司農司立法佃種給鈔五百萬錠以供工費牛具農器穀種用之又畧倣前集賢學士虞集議於江淮召募能種水田及修築圍堰之人各千人爲農師降名勅牒十二道募農民百人者授正九品秩二百人者正八品三百人者從七品就以領其所募之人所募農夫人給鈔十錠期年散歸

皇明

司農之職總于戶部不設司農卿及行司農等官惟上林苑監仍舊 洪武二十五年議開上林苑比圖上 上曰妨民業不可遂止 永樂五年始設今上林苑監正五品其屬良牧蕃育嘉蔬林衡冰鑑典察左右前後十署各設典署署丞錄事 洪熙元年以蕃育蕪良牧林衡嘉蔬蕪冰鑑林衡典察四署皆并蕃育嘉蔬 宣德十年定蕃育嘉蔬良牧林衡四署 上林苑監左右監正各一人左右監副各一人左右監丞各一人其屬典簿一人良牧蕃育林衡嘉蔬四署各典署一人署丞一人錄事二人吏六人監正掌苑園園池牧畜種樹之事副丞為之貳凡禽獸草木蔬菓率其屬督其養戶栽戶以時經理其養地栽地而畜植之以供祭祀賓客 宮府之膳羞凡苑地東至白河西至西山南至武清北至居庸關西南至渾河並禁園獵典簿勾校文移良牧牧牛羊豕蕃育育鶩鴨鷄皆籍其牝牡之數而課孳卯馬林衡典果實花木嘉蔬典蒔藝瓜菜皆計其畦町樹植之數而以時苞進焉

太府卿

遼南面太府監官曰太府太監曰太府少監曰太府監丞曰太府監主簿 金太府監左右藏支應所太倉酒坊典給署市買司隸焉 監正四品少監從五品丞二員從六品掌出納邦國財

用錢穀之事 左藏庫使從六品副使從七品興定三年增一

員掌金銀珠玉寶貨錢幣本把右藏庫使從六品副

使從七品興定三年增一員掌錦帛絲綿毛褐諸道常課諸色

雜物本把支應所又作支所都監二員正九品掌宮中

出入御前支賜金銀幣帛大安三年省太倉使從六品掌

九穀廩藏內出之事御除副使從七品 酒坊部除使從

八品副使正九品掌醞造御酒及支用諸色酒醴 典

給署本鈎盾署明昌三年更令從六品舊曰鈎盾使丞

從七品舊曰鈎盾副使掌宮中所用薪炭冰燭并管官

戶直長一員正八品鈎盾署古屬向農寺市買司天德二年更

為市買局使從八品副使正九品掌收買宮中所用果

實生料諸物 平準務使從六品副使從七品勾當官

六員元光二年五月設十月罷

元制大府監秩正三品領左右藏等庫掌錢帛出納之數

太卿六員正三品太監六員從三品少監五員從四品

丞五員正五品經歷知事照磨各一員 中統四年置

至元四年為宣徽太府監凡內府藏庫悉隸焉十九年

九月分三庫二十二年立規措所主經營錢穀以善賈

為之秩從五品二十二年立泉府司秩從二品二十四

年陞萬億庫官秩四品 內藏庫提點四人使副各二

人掌出納御用諸王段疋納失失紗羅絨錦南錦香貨

諸物又主御用寶玉遠方珍異 右藏提點四人使副

諸物又主御用寶玉遠方珍異 右藏提點四人使副

各二人掌收支金銀寶鈔紵絲段疋只孫水晶瑪瑙玉璞諸物 左藏提點四人使副各二人掌收支常課和買紗羅布絹絲綿絨錦木棉舖陳衣服諸物

利用監與大府並列 至元十年置掌出納皮貨衣物之事監卿八人太監五人少監五人監丞四人經歷知

事照磨管勾各一人所隸官司十 資用庫提點二人大使三人副使五人 怯憐所皮局人匠提舉司提舉

二人同提舉提控各一人 雜造雙線局大使副使直長典史各一人造內府皮貨鷹帽等物 熟皮局大使

副使直長各一人掌每歲熟造野獸皮貨等物 軟皮局大使副使直長各一人掌內府細色銀鼠野獸皮貨

等物 斜皮局副使二人掌每歲熟造內府各色野馬皮袴 貂鼠局提舉司提舉一人同提舉副提舉各一

人 貂鼠局副使二人直長一人 染局副使一人直長一人管勾一人掌每歲變染皮貨 熟皮局使副各

一人典史一人 皇明酒醴掌之光祿金玉諸貨掌之十庫不設此官

秘書監

遼南面秘書監官曰秘書監曰秘書少監曰秘書監丞曰

秘書監主簿外有秘書郎有秘書郎正字所屬著作局有校書郎統和中楊佺嘗居此職下有校書正字

金秘書監著作局筆硯局書畫局司天臺隸焉監一員從

三品少監一員正五品丞一員正六品秘書郎二員正

七品泰和三年定為二員通掌經籍圖書校書郎一員從七品以

翰林官兼專掌校勘在監文籍 筆硯局直長二員正

八品掌御用筆墨等事 泰和七年以女直應奉兼舊

筆硯令史太定三年改為筆硯供奉以辨諱改為承奉 書畫局直長一員正八

品掌御用書畫紙札都監正九品二員或一員 著作

局著作郎一員從六品著作佐郎一員從七品掌修日

曆皇統二年著作局設郎與佐郎各二員以學士院兼領之

元制秘書監秩正三品掌歷代圖籍并陰陽禁書卿四員

正三品太監二員從三品少監二員從四品監丞二員

從五品典簿一員從七品屬官著作郎二員從六品著

作佐郎二員正七品秘書郎二員正七品校書郎二員

正八品辨驗書畫直長一員正八品 至元九年置其

監丞皆用大臣奏薦選世家名臣子弟為之大德九年

陞正三品給銀印 延祐元年定置卿四員參用宦者

二人 順帝至元九年刻小玉印以至正珍秘為文凡

秘書監所掌書畫皆識之

皇明不設圖籍禁書藏之內府

太史局令

遼太史令屬司天監

金不設

元特置太史院秩正二品掌天文曆數之事置院使五員

續文獻通考

卷之九十二

一

四四八

正二品同知二員正三品僉院二員從三品同僉二員
 正四品院判二員正五品經歷一員從五品都事一員
 從七品管勾一員從九品 春官正兼夏官正一人正
 五品 秋官正兼冬官中官正一人品同 保章正五
 人正七品 保章副五人正八品 掌曆二人正八品
 腹裏印曆管勾一人從九品 各省司曆十二人正
 九品 印曆管勾二人從九品 靈臺郎一人正七品
 監候六人從八品 副監候六人正九品 星曆生
 四十四人 挈壺正一人從八品 司辰郎二人正九
 品 燈漏直長一人 教授一人從八品 學正一人
 從九品 校書郎二人正八品

司天監

遼南向司天監有太史令其下曰司曆曰靈臺郎曰挈壺
 正曰五官正曰五官丞曰五官主簿曰五官靈臺郎曰
 保章正曰司曆監候曰司晨刻漏博士曰典鍾曰典鼓
 金司天臺隸秘書監提點正五品監從五品掌天文曆數
 風雲氣色密以奏聞少監從六品判官從八品教授舊
 設二員正大初省一員係籍學生七十六人漢人五十
人女直二十六人試補長行
 司天管勾從九品不限資考員數隨科十人
設一員以藝學尤精者充長行人五
 十人求授職事者
試補管勾天文科女直漢人各六人筭律科八
 人三式科四人測驗科八人漏刻科二十五人銅儀法
物舊在

法物庫貞元二年始付本臺

元初因金人舊制立司天臺設官屬 至元八年以上都承應闕官增置行司天監 十五年別置太史院與臺並立頒曆之政歸院學校之設隸臺後改臺為監置司天監三人掌凡曆象之事少監五人丞四人知事一人通事兼知印一人官屬有提舉二人教授二人學正二人天文科管勾二人筭曆科管勾二人三式科管勾二人測驗科管勾二人漏刻科管勾二人陰陽管勾一人押宿官二人司辰官八人天文生七十五人 回回司天監初元世祖在潛邸有旨徵回回為星學官以其藝進未有官署 至元八年始置司天臺後改為監命秘書卿提調監事已別置提點一人司天監三人少監監

不二人掌觀象衍曆知事通事兼知印各一人官屬有教授一人天文科管勾一人筭曆科管勾一人三式科管勾一人測驗科管勾一人漏刻科管勾一人陰陽生十八人 十二年春用王恂薦以許衡領太史院事初承用金大明曆歲久寢踈欲釐正之乃命王恂及楊恭懿郭守敬測驗改正而以張文謙張易董之恂言曆家知曆數不知曆理宜得許衡總之遂命衡領太史院事 十六年二月太史令王恂請建司天臺于大都儀象圭表皆銅為之增銅表至四十尺測影長而真又請上都洛陽等五處分置儀表各選監候官從之因勅郭守敬由上都抵南海測影具訪通天文曆數者

皇明

國初置欽天監正五品初名太史令通判僉判校事郎五官正劉基爲太史令兼太子率更令後改爲院設院使同知院判五官正典簿兩場司時序郎紀候郎基又爲院使洪武元年改爲司天監設監令少監監丞主簿主事五官正副監候司晨漏刻博士又置回回司天監設監令少監監丞三年始改欽天監四年改監令爲正儀大夫少監分朔大夫五官正司玄大夫監丞靈臺郎五官保章正平秩郎五官靈臺郎司正郎挈壺正挈壺郎諸散官十四年再定品員散官給授如文官二十二年改監令監丞爲監正監副三十一年革回回監回回曆

法隸於欽天監

欽天監監正一人監副二人其屬主簿一人春夏中秋冬官正各一人五官靈臺郎四人五官保章正二人五官挈壺正一人五官監候二人五官司曆二人五官司辰二人漏刻博士二人吏四人

監正掌察天文定曆數監副爲之貳凡日月星辰風雲氣色之變異率其屬而占候焉密疏上凡玄象圖書非其職不得預凡習業者分爲四科曰天文曰漏刻曰回回曰曆自五官正下至天文生陰陽人各專科肄焉凡觀象登臺臺四面面四人凡歲大統曆御覽月令曆七政躔度曆六壬遁甲曆並先期奏行下凡曆註上曆三

十事民曆三十二事壬遁曆六十七事凡歲祭日先一歲會選奏上凡營建師旅冠婚 陵寢選地擇日凡立春先期候氣於東郊凡大朝賀設定時鼓於文樓報時鷄唱擊鼓各共其事凡四季天象占驗曆 御覽天象錄以時奏上凡疇人世業立師而教之乏人移禮部訪取試用之五官正專理曆法造曆司曆監候佐之靈臺郎辨日月星辰之躔次分野以占候天文之變凡瑞星妖星瑞氣妖氣考諸雜占保章正專志天文之變辨其吉凶之占挈壺正知漏刻孔壺為漏浮箭為刻以考中星昏明之候漏刻博士定時更時報更警晨昏皆鍾鼓司佐之

事例

凡天文如日月星辰風雲霾霧本監各委官生晝夜占候或有變異舊例自具白本占奏 正統後始會堂上官僉書同奏其觀象臺分定四面每面天文生四人專視 凡本監觀星有盤係 洪武十七年造又渾天璿璣玉衡簡儀俱 正統四年造十一年奏准簡儀修刻黃道等度圭表壺漏俱如南京舊制又造晷影堂以便窺測調品 景泰六年又造簡儀銅壺 凡定時刻在漏換時有牌報更有鼓警晨昏有鍾鼓其器皆設於譙樓初皆屬順天府 正統六年改屬本監輪差漏刻博士提調陰陽人如法調壺換牌其陰陽人仍從順天府

各縣僉克鍾鼓改屬旗手衛撥軍擊撞 凡推筭日月
交食本監先期備開分秒時刻并起復方位具奏禮部
通行內外諸司臨時救護食畢本監仍按占書具奏如
食不及一分與回回曆雖食一分以上俱不行救護至
救護時本監官專報時候不隨班行禮 凡歲造大統
曆先期二月初一日進呈來歲曆樣然後刊造一十五
本送禮部差人齎至南京并各布政司照樣刊印 凡
每歲進 御覽月令曆大統曆七政躔度曆 洪武間
以九月初一日進後以十一月初一日進當日以大統
曆給 賜百官頒行天下 東宮曆同日於 文華殿
進其儀注俱見禮部祠祭司 太皇太后 皇太后

中宮曆俱司禮監官捧進本監仍具本奏知凡頒曆後
各 王府差人於 內府司禮監關領其 內府各衙
門亦於司禮監給散如琉球占城等外國正統以前俱
因朝貢每國給與王曆一本民曆十本今常給者惟朝
鮮國王曆一本民曆一百本 凡造曆以 洪武甲子
爲曆元仍依舊法推筭不用捷法 洪武九年 欽定
曆註永爲遵守 上曆註三十事 東宮親王曆同民
曆註三十二事 永樂七年 欽定壬遁曆註六十二
事 凡進用諸曆俱以紅墨字分辨并各有尺寸裁造
親王諸曆及民曆亦各依式裁造其黃藍綾絹及黃
紙裹造者俱有定式 凡頒曆 洪武初有司徵斂工

續文獻通考卷之九十一
本錢十四年免徵 永樂後合用各色綾絹紙劄顏料
俱先二年十二月內會計有無閏月合用若干奏行山
東等布政司真定等七府買辦 凡選郊祀時享等項
日期每歲十一月中本監堂上官擇日率曆科官午後
沐浴更衣於本衙門齋宿次日早會選具副本請 旨
仍具例行 內府中路并設案題本得 旨次日早掌
印官捧正本照例行至 奉天門案前跪進俟 御覽
畢叩頭由東門出復班仍具揭帖差官齋赴禮部太常
寺知會 凡營造出師等事奉 旨選擇年月日時方
位進呈若 陵寢及各 王府安葬選擇吉地奏用其
差委官生各有次第不許紊亂 凡每歲立春日本監

差官二員往順天府候氣回監具呈依書占奏 凡立
春前期候氣官同順天府官赴東直門外導引芒神春
牛至府 凡遇 聖節正旦冬至及頒 詔大禮先期
本監官面奏設定時鼓於文樓至期定時漏刻博士一
員報時五官司辰一員立 御道東鷄唱五官司辰一
員擊鼓漏刻博士一員登文樓候 上陞殿鳴鞭已畢
報時官捧時牌報卯時鷄唱官唱日出卯照萬方光四
表畢擊鼓五聲 凡本監人員 洪武六年令永遠不
許遷動子孫只習學天文曆筭不許習他業其不習學
者發海南充軍 凡本監官犯罪 成化十三年奏准
應爲民者仍充天文生應役應發充軍者奏請處治

凡本監官生有父母喪例免丁憂 凡天文生除本身外再免一丁充當民差陰陽人止免本身其各衙門不係應免者不惟 凡天文生食糧月支七斗陰陽人四斗俱照醫士醫生例其譙樓陰陽人正支三斗 凡天文生俱以父祖世業代補有缺舊例天下訪取仍會禮部考驗收用後或有投充及收用義男女壻者禮部議惟不許止選世業子弟立教師教習有成遇天文生缺於內選用其教師亦量陞授 弘治十一年不訪取世業原籍子孫分山林隱逸之士及致仕退閒等項官吏分監生生員軍民人等有能精通天文曆數陰陽地理及五星子平遁甲大定弁六壬占課灼龜等術者每府不過一二人試中收充供役 凡觀象臺譙樓合用燈油木炭等及祭祀齋宮調品壺漏亦有油炭俱行禮部坐派順天府送用 凡天下府州縣舉到陰陽人堪任正術等官者俱從吏部送本監考中送回選用不中者發回原籍爲民原保官吏治罪 凡本監合用紙劄成化間奏准照例遇吏部送考陰陽生中式者令其量出應用 凡天文生有犯 弘治十三年奏准徒流照舊例決杖一百餘罪收贖笞杖有力納鈔無力的決其犯竊盜掏摸搶奪等項亦刺字充警弁雜犯死罪俱做工不在收贖之限 凡本監俸糧初於禮部支給後從戶部撥本監自行收放

南京欽天監事例

凡本監造曆每年六月內從禮部發到曆樣印完給散
 南京各衙門并直隸各府州縣 凡本監造曆紙分派
 應天寧國二府并浙江解納俱限六月以裏至京 凡
 占候天象本監自 洪武以來設觀星臺於鷄鳴山上
 今天文生分班晝夜觀望或有變異開具揭帖呈堂上
 官奏聞者隨即具奏 凡天文生俱以世業子弟習學
 考選食糧分撥各科 凡天文生月糧照欽天監例

殿中監

遼北面有著帳郎君院官曰著帳郎君節度使曰司徒

輦痕德重可汗以蒲古只等二族害于越室魯以其家屬汎入瓦里應天皇太后知國取析出之以爲著帳郎

君娘子每加於恤世宗悉免之其後內族外戚及世官之家罪犯者皆没入瓦里人戶益衆因復故名皇太后皇太妃皆有著帳諸局叛逆家屬執事禁衛此遼所以多變起肘腋也

祇候郎君班詳穩司官曰祇候郎君班詳穩曰直長曰
 開撒絨曰祇候郎君曰祇候郎君拽刺走卒外又有左

右祇候郎君班詳穩司官屬各同上 筆硯局 牌印

局 裊褥局 燈燭局 牀帽局 殿幄局 車輿局

御蓋局 本班局八局並設祇候郎君與吏 皇太

后祇應司 皇太妃祇應司 皇后祇應司 近位祇

應司 皇太子祇應司 親王祇應諸司並設領局事

與知諸司事 著帳戶司官曰著帳節度使曰著帳殿

中 著帳戶司本諸幹魯朶戶析出及諸色人犯罪没入

凡御帳皇太后皇太妃皇后皇太子親王祇從伶官

皆充其役

承應小底局

筆硯小底

寢殿小底

佛殿

小底

司藏小底

習馬小底

鷹坊小底

藥湯小

底

尚飲小底

盥漱小底

尚膳小底

尚衣小底

裁造小底

南面殿中司隸于御史臺官曰殿中曰

殿中丞其屬有尚舍局奉御尚乘局奉御尚輦局奉御

尚食局奉御尚衣局奉御

金殿中監事多領于殿前都點檢司其官屬載于殿前司

目下其分領符寶郎宿直將軍振肅宮籍監近侍等諸

局署鷹坊頓舍官載于此

符寶郎四員

見前四員省符寶司

左右宿直將軍從五品掌總領親軍凡宮城諸門衛禁

并行從宿衛之事八員 左右振肅正七品掌妃嬪出

入總領護衛導從

宮籍監提點正五品監從五品副

監從六品丞從七品掌內外監戶及地土錢帛大小差

發直長二員正八品

掌同

近侍局提點正五品泰和

八年朔設使從五品副使從六品掌侍從承勅令轉奏

進帖直長正八品

大定十八年增二員奉御十六人舊日各入寢殿小底奉御三十人又各外

帳小底大定十二年更

器物局提點正五品使從五品副使從

六品掌進御器械鞍轡諸物直長正八品監都正九品

月昌二年省

同監從九品

泰和四年設

尚廐局官

見前太僕寺典廐署

下 尚輦局使從五品副使從六品掌承奉輿輦等事

直長正八品

資考

典輿都轄從九品

資考

收支都監

正九品

大定二年設

掌給受之事同監從九品

泰和四年設

本把

四人 鷹坊提點見前司農寺林署下 武庫署令從六品掌

收貯諸路常課甲仗以曉軍器丞從七品直長二員正

八品大定二年 武器署提點從五品令從六品丞從

七品掌祭祀朝會巡幸及公卿婚葬鹵簿儀仗旗鼓笛

角之事直長正八品或二員 頓舍官二員泰和令總格作四員 正八

品

元

元初殿中監事皆領於四怯薛而兼宿衛四怯薛者太祖

功臣博爾忽博爾木木華黎赤老温四族也號撥里班

曲律猶華言四傑也命其世領怯薛之長怯薛云者猶

言番直宿衛也凡宿衛三日一更申酉戌日博爾忽領

之為第一亥子丑日博爾木領之為第二寅卯辰日木

華黎領之為第三巳午未日赤老温領之為第四博爾

忽早絕太祖命別速部代之而非功臣之類因自領名

曰也可怯薛也可者言天子自領也赤老温後亦絕常

以丞相兼領凡怯薛內其執事之名不一具列于後

主弓矢鷹隼者曰火兒赤昔寶赤怯憐赤 主書寫聖

旨者曰札里赤 主文書者曰必閣赤 主奉烹膳者

曰博爾赤 主司閤者曰八刺哈赤 主掌酒者曰答

刺赤 主典車馬者曰兀刺赤 主衣服者曰速古兒

赤 主牧駱駝者曰帖麥赤 主牧羊者曰火爾赤

主捕盜者曰忽刺罕赤 主奏樂者曰虎火赤 忠勇

續文獻通考卷之九十二
○五百五十五
者曰霸魯都勇敢無敵者曰拔突長以上怯薛悉世
守之年勞既久即擢爲一品官其預怯薛者或以才能
任使貴盛雖極然一日歸至內庭則執事如故其後怯
薛累增至萬四千八百而累朝幹耳朶怯薛尤多國家
大費每糜於此云

文宗至順元年八月沙汰衛士省院臺官奏定擬大內四
宿衛每衛不過四百人累朝宿衛各不過二百人鷹坊
萬四千二十四人當減四千人內養九十九人及怯薛
當留者各百人累朝舊邸官分養人三千二百二十四
人當留者一千一百二十人媵臣怯薛口共萬人當留
者六千人其汰斥者歸本部著籍應役有容匿濫充者

怯薛官與其長杖五十七没家貲之半賞告者令監察
御史常察之制曰可

陶宗儀曰元朝有四怯薛大官怯薛者分宿衛供奉之
士爲四番番三晝夜凡上之起居飲食諸服御之政令
怯薛之長皆總焉中有云都赤乃侍御之至親近者雖
官隨朝諸司亦三日一次輪流入直負骨朶于背佩環
刀于腰或三人四人多至八人時若上御控鶴則在墀
陛之下蓋所以虞奸回也雖宰輔之日覲清光然有所
奏請無云都赤在則不敢進今中書移咨各省或有須
備錄奏文字者內必有云都赤某等以此之故又究骨
朶字義嘗記宋景文筆記曰關中人以腹大爲胍朶音

音都 俗音謂杖頭大者亦曰脈牝後訛為骨朶朶平

二年置侍正府郎殿中監職也秩正二品侍正十四人

同知二人僉府二人侍判二人掌內庭近侍之事領速

古兒赤四百人奉御二十四人拱衛直都指揮使司為

其屬首領官有經歷都事照磨餘小吏有差 奉御二

十四員秩五品 尚冠奉御二員從五品 尚冠副奉

御二員從六品 尚衣奉御二員從五品 尚衣副奉

御二員從六品 尚鑿奉御二員從五品 尚鑿副奉

御二員從六品 尚沐奉御二員從五品 尚沐副奉

御二員從六品 尚飾兼尚輦二員正六品 尚飾兼

尚輦副奉御二員正七品 奉御掌簿四員從七品

尚乘之職舊本隸殿中監而元特立尚乘寺秩從三品

掌上御鞍轡輿輦阿塔思群牧駙馬驢騾及領隨路局

院鞍轡等造作收支行省歲造鞍轡理四怯薛阿赤詞

訟起取南北遠方馬匹等事卿四員正三品少卿二員

從四品丞二員從五品經歷知事照磨管勾各一員至

元二十四年罷衛尉院始設尚乘寺領資乘庫大德十

一年升為院秩從二品至大四年復為寺延祐四年降

從三品 資乘庫提點四人大使三人副使四人掌收

支等物

皇明奉御諸事俱屬內侍此官不設

少府監

遼南面少府事寄于殿中司而少府監不設

金少府監尚方織染文思裁造文繡等署隸焉泰和四年選能幹官

兼儀鸞局近上官 監正四品少監從五品丞二員從六品太定十一年復置

掌邦國百官營造之事 尚方署令從六品

丞從七品掌造金銀器物亭帳車輿牀榻簾蓆鞍轡傘

扇及裝釘之事大定二十年令不專除人令人兼 直長正八品 圖畫

署明昌七年省入祗應司 令從六品丞從七品掌圖畫鏤金 匠

直長正八品明昌三年省 裁造署令從六品丞從七品掌

造龍鳳車具亭帳舖陳諸物宮中隨位牀榻屏風簾額

條結等及陵廟諸物并臺省部內所用物泰和令有繪畫之事 直

長從八品明昌三年省裁造匠六人 文繡署令從六品

丞從七品掌繡造御用并妃嬪等服飾及燭籠照道花

卉貞祐二年止 直長正八品繡工一人都灑頭一人副

人內上頭七十六人 織染局令從六品丞從七品直

長正八品掌織絳色染諸供御及宮中錦綺幣帛紗縠

文思署明昌七年省入祗應司 令從六品丞從七品掌造內外

局分印合傘浮圖金銀等尚輦儀鸞局車具亭帳之物

并三國生日等禮物繡染文繡兩署金線直長正八品

明昌三年省

元世祖至元十九年以大都留守兼知少府監事二十一

年并少府監歸留守司皇慶元年別置少府監延祐七

年罷少府監復以留守兼監事其屬多詳于留守司而

中尚監乃特立者外又勅章佩監皆少府事 中尚監
掌大幹耳朶位下怯怏口諸務及領資成庫氈作供內
府陳設帳房帟漢車輿雨衣之用監卿八員正三品太
監二員從三品少監二員從四品監丞二員正五品經
歷知事照磨各一員 至元十五年置尚用監二十四
年改置中尚監三十年分置兩都灤河三庫怯怏口雜
造等九司局而總領之 至大元年陞為院四年復為
監參用宦者三人 資成庫掌造氈貨提點三員從五
品大使三員正六品副使三員正七品 至元二年罷
置太府二十三年始歸于監 章佩監掌宦者速古兒
赤所收御服寶帶監卿五員正三品太監四員從三品
少監二員從四品監丞二員正五品經歷知事照磨各
一員 至元二十二年置 至大元年陞為院四年復
為監 御帶庫掌繫腰偏束等物并條環諸物供奉御
用以備賜予提點三員大使三員副使二員品秩同資
成 至元二十八年置 以中官為之元貞元年增二
員兼署上都之事 異珍庫掌御用珍寶后妃公主首
飾寶貝官員品秩俱同上至元二十八年置

將作監

遼北面器物局 有局使局副使又總客省大醫獸醫置
四局都林牙 南面將作監官曰太監曰少監曰監丞
曰監主簿

金將作監不設屬工部者有修內司大定七年設使從五品副

使從六品掌官中營造事兵匠一千六十五人兵夫二千

直長二員正八品部役官四員正八品掌監督工役受

給官二員正八品掌支納諸物 都城所提舉從六品

同提舉從七品掌修完廟社及城隍門鑰百司公廨係

官舍并栽植樹木工役等事左右廂官各二員正八品

掌監督工役受給官二員正八品掌支納諸物及埏埴

等事 祇應司提點從五品令從六品丞從七品掌給

宮中諸色工作直長正八品收支庫都監同監泰和元年置

甄官署令從六品丞從七品直長正八品掌剡石及埏

埴之事

元將作院掌成造金玉珠翠犀象寶貝冠佩器皿織造刺

繡段匹異樣百色造作定置院使七員正二品同知二

員正三品同僉二員正四品院判二員正五品經歷一

員從五品都事一員從七品照磨管勾一員正八品令

史六人譯史知印各二人宣使四人其修建宮殿等事

務中統二年立宮殿府專職管繕事 至元十九年罷

宮殿府以其事屬大都留守司將作所屬附見

諸路金玉人匠總管府掌寶具金王冠帽繫腰束帶金

銀器皿并總諸司局事總隸將作院定置達魯花赤二

員正二品總管二員從三品副達魯花赤一員正四品同

知二員從四品副總管二員正五品經歷一員從七品

知二員從四品副總管二員正五品經歷一員從七品

知事一員從八品照磨管勾各一員 玉局提舉司提舉一員正七品同提舉一員從七品副提舉一員正八品 中統二年以和林人匠置局造作始設直長 至元三年立玉匠局用七品印十五年改提舉司 金銀器監提舉司官員品秩俱同上 瑪瑙提舉司提舉一員同提舉一員吏目一員 至元九年置大都等處瑪瑙局秩從七品管領瑪瑙匠戶五百有奇置提舉三員受金玉府劄十五年改立提舉司領大都弘州兩處造作陞從五品三十年改置提舉司員定置如上 陽山瑪瑙提舉司至元十五年置提舉司員品秩如前 金絲子局大使一員副使一員正七品

長一員 中統二年設二局二十四年併 鞋帶斜皮局大使一員從八品副使一員正九品至元十五年置 璫玉局大使一員從八品至元十五年置 浮梁磁局掌燒造磁器并漆造馬尾椽藤笠帽等事大使一員正九品副使一員至元十五年置 畫局掌描造諸色樣製大使一員從八品至元十五年置 管領珠子民匠官掌採撈蛤珠於楊村直沽等處 中統二年立管領官正七品子孫世襲 裝釘局大使一員從八品至元十五年置 大小雕木局大使一員從八品至元十五年置 宣德隆興等處瑪瑙人匠提舉司提舉一員從七品副提舉一員從八品至元十五年置 溫犀玳

琯局大使一員從八品至元十五年置 上都金銀器
盒局大使一員從六品副使直長各一員至元十六年
置 漆紗冠冕局大使副使各一員至元十五年置
大都路採砂所至元十六年置管領大同路撥到民一
百六戶歲採磨玉夏水砂二百石起運大都以給玉工
磨礮之用大使一員 管領都提領所都提領一員從
七品掌金玉府諸人匠詞訟至元十三年置 監造諸
般寶貝官達魯花赤二員正五品至元二十一年置
收支諸物庫大使從八品副使一員正九品至元十五
年置 行諸路金玉人匠總管府至大間置于杭州達
魯花赤總管各一員並從三品同知一員正五品副總
管一員從五品經歷一員從七品知事一員從八品提
控按牘一員

異樣局總管府中統二年立提點所至元六年改總管
府定置達魯花赤一員總管一員並正三品同知一員
從四品副總管一員從五品經歷一員從七品知事一
員從八品 異樣紋繡提舉司中統二年立局至元十
四年改提舉司提舉一員從五品同提舉一員正七品
副提舉一員正八品 綾錦織染提舉司至元二十四
年改局置提舉司官數品秩俱同上 紗羅提舉司至
元十二年改局置提舉司官數品秩俱同上 紗金顏
料總庫中統二年置大使一員從九品副使一員

大都等路民匠總管府總管一員正三品同知一員正五品副總管一員從五品經歷一員從七品知事一員從八品提控案牘一員 備章總院大使一員正六品副使一員從六品至元十三年省併楊蘭等八局為總局 尚衣局達魯花赤提舉各一員從五品同提舉一員正七品副提舉一員正八品都目一人 御衣局設官同上皆至元二年置 御衣史道安局秩從六品至元二年置以史道安掌其職因以名之 高麗提舉司從五品至元二十二年置提舉一員 織佛像提舉司秩五品延祐四年改提領所為提舉司提舉副提舉各二員

皇門設文思院等衙門屬工部專掌造作諸事不設少府將作三監

文思院大使一員副使二員 洪熙元年添設大使副使共六員分管院事後裁革 巾帽局設于內府大使一員副使一員後俱革 針工局設于內府大使一員副使一員後俱革 營繕所所正二員後革所副二員所丞二員後添設二員管器 皮作局大使一員副使二員革 顏料局後革大使一員 寶源局大使一員副使一員嘉靖四十年革 鞍轡局大使一員副使一員隆慶元年俱革 軍器局大使一員副使二員後革 節慎庫嘉靖八年設大使一員 廣積抽分竹木局後添大使一員副使一員隆慶五年革 通積抽分竹木局後添大使一員

續文獻通考

後廣濟白河革副使一員二局兼之織染所雜造局後添設大使一

員副使一員盧溝橋通州白河三處抽分竹木局設

大使各一員副使各一員後正統九年添設盧溝橋副

使二員後大通關提舉司提舉一員萬曆二年革副提舉

二員後典史一員革柴炭司大使一員副使一員

龍江提舉司提舉一員副提舉二員典史一員龍江

抽分竹木局後大使一員副使二員後又添設二員

續文獻通考卷之九十三

皇明進士雲間王圻纂輯

職官考 國子監宗學軍器監都水監內侍省

國子監

遼南面國子監太祖置於上京中京國子學隸焉官曰祭

酒曰司業曰監丞曰主簿

金海陵天德三年初置國子監國子學太學皆隸焉官祭

酒正四品司業正五品掌學校丞二員從六品明昌二

年增一員兼提控女直學

元世祖至元初以許衡為集賢館大學士國子祭酒教國

子與蒙古大姓四怯薛人員選七品以上朝官子孫為

國子生隨朝三品以上官得舉凡民之俊秀者入學為陪堂生伴讀至元二十四年始置監祭酒一員從三品司業二員正五品掌學之教令皆德尊望重者為之監丞一員正六品專領監務典簿一員令史二人譯史知印典吏各一人皇慶二年置崇文閣于國子監外別有國子學 蒙古國子監世祖至元十四年始立至二十九年准漢人國子監例置祭酒司業監丞秩亦同外有蒙古國子學世祖至元八年置掌教習諸生於隨朝百官怯薛台蒙古漢兒官員家選子弟俊秀者入學

國子博士

遼南面五京各設國子學有博士有助教其在南京者曰

太學

金國子學博士二員正七品分掌教授生員考藝業太學同明昌二年添女直一員泰和四年減大安二年並罷助教二員正八品女直漢人各一員

教授四員正八品分掌教誨諸生明昌二年小學各添一員承安五年除一

員國子校勘從八品掌校勘文字國子書寫官從八品掌書寫實錄 太學博士四員正七品大安二年減二員助教

四員正八品明昌二年除一員大安二年減二員國子學與太學皆隸國

子監

元國子學秩正七品置博士二員掌教授生徒考校儒人著述教官所業文字助教四員分教各齋生員大德八年為分職上都增置助教二員學正二員學錄二員督

習課業典給一員掌生員饌食國子監與國子學皆隸
集賢院 興文署秩從六品署令一員以翰林修撰兼
之署丞一員以翰林應奉兼之至治二年罷置典簿一
員從七品掌提調諸生飲饌與凡文牘簿書之事隸集
賢院
蒙古國子學初置博士教授助教官五員後以每歲從
駕上都教習事煩增學正學錄各二人三十一年又增
助教一人與蒙古國子監俱隸蒙古翰林院

皇明

太祖乙巳歲置國子學以元故集慶路儒學爲之設博士
助教學正學錄典樂典書典膳等官 吳元年定國子

學官制添設祭酒正四品司業正五品博士正七品典
簿正八品助教從八品學正正九品學錄從九品典膳
省註十年置中都國子學十四年更祭酒一人從四品
司業二人正六品其屬監丞二人正八品博士五人助
教十五人典簿一人俱從八品學正十人正九品學錄
七人典膳一人俱從九品掌饌二人雜職十五年相地
于都城之北改國子學爲國子監頒教條及禁例于天
下二十六年革中都國子監三十一年壽州學訓導劉
亨疏國子祭酒品位不當在太僕寺卿下 上頗納其
說後惟陞監丞爲堂上官 成祖即位詔復洪武官制
監丞仍舊屬官 永樂元年設北京國子監列爲二監

至十九年定鼎北京于留都加南京二字 宣德元年
省司業至 弘治十五年復置然二監雖並列而治法
本原實始于南

國初為國子學正四品設博士助教學正學錄典樂典書
典膳乙巳秋以許存仁為博士吳元年添設祭酒司業

典簿改典膳為掌饌陞存仁為祭酒劉承直司業蘇伯
衡學正洪武六年增廣國子生 諭禮部祭酒乏人其

詢天下名士通今博古才德堪為人師者以名聞八年
又置中都國子學十五年始改國子學為國子監從四

品十六年宋訥代吳顯為祭酒 命曹國公李文忠領
國子監事 車駕時時臨視以故監官不得中廳而坐

中門而行二十六年革中都國子學建文中陞監丞為
堂上官增司業二人省博士學正學錄增助教十七人

靖難後復故
祭酒掌國學舉人貢生官生恩生功生例生夷生年幼

勲臣訓教之事司業為之貳凡訓教諸臣奉監規而損
益焉要在明體適用以孝弟忠信禮義廉耻為本隆師

親友讀書寫字為業有不率者朴之不悛徙謫之其率
教者有升堂積分及超格叙用之法凡課業做書季呈

翰林院文冊歲奏上凡歲仲春秋上下 遣大臣祀先
師則總其禮儀 上謁先師幸太學及司業執經講義

凡授經以易書詩春秋禮記人占一經大學中庸論語

孟子兼習之以廩饌贍師生以力役給厨膳以賜予
示恩賚以寧假悉人情以撥歷練吏事以考選汰冗濫
監丞坐繩愆廳叅領監事凡師生怠教不率教及廩膳
不潔並糾懲之而堅明其約束師生有過書而識之博
士坐博士廳五人分經訓教助教學正學錄坐正義崇
志廣業修道誠心率性堂專職教誨嚴程課講解經義
文字約之規矩典簿典出納文移受支金錢季報課業
典籍收掌經史子集及制書掌饌飲食師生
太祖親製條規十八款于監即今之監規云仍令天下各學勒卧
碑以示諸生詳見學校下

宗學 內小學

宋寧宗嘉定七年復建宗學置博士學諭各一人遼金元
無其職

理宗淳祐七年以皇姪孟啓開講於內小學置直講贊講
二人遼金元不設

皇明不設此官別有宗學一欵見學校門

軍器監

遼北面有五冶官設太師未詳所司大率掌治軍器
金承安二年設軍器監泰和四年罷復并甲坊利器兩署
爲軍器署置令丞直長直隸兵部至寧元年復爲軍器
監軍器庫利器署隸馬舊轄甲坊利器兩署監從五品少監從六
品丞從七品掌修治邦國戎器之事直長正八品軍

器局至寧元年隸太興府貞祐三年改屬本監使正八品副使正九品省擬不奏掌收支河南一路併在京所造常課橫添和買軍器大定五年設甲坊署泰和四年廢舊置令

丞直長 利器署本部作院興定二年更今名令從六品丞從七品掌修弓弩刀槊之屬直長正八品八作

左右院使從五品副使從六品掌收軍須軍器此不隸軍器監 軍器庫使一員正八品副使一員從九品掌

甲冑兵仗司吏二人庫子掌出納之數看守巡護中都南京依此置西京省副使北京惟副使仍兼入作使隨府節鎮設使副若軍器兼作院軍資兼軍器庫及防刺郡則置都監一員以軍資監者如舊 此

不隸軍器監 作院使一員副使一員掌監造軍器兼管囚徒判院事都監一員掌收支之事牢長監管囚徒及差設牢子中

都南京依此置仍加都字南京省都監一員東京西京置使或副一員上京並省隨府節鎮作院使副並以軍器使副兼之其或置一員或以軍資庫兼之右元設甲院都監處薊州專設使副者並仍舊 此不隸

軍器監

元為武備寺掌繕治戎器兼典受給卿四員正三品同判六員從三品少卿四員從四品丞四員從五品經歷知事各一員照磨兼提控案牘一員承發架閣庫管勾一員辨驗弓官二員辨驗筋角翎毛等官二員令史十有三人 至元五年始立軍器監秩四品十九年陞正三品二十年立衛尉院改軍器監為武備監秩正四品隸衛尉院二十一年改監為寺與衛尉並立 大德十一年陞為院 至大四年復為寺設官如舊其所轄屬官

則自為選擇其匠戶之能者任之 壽武庫提點一員
 從五品大使二員正六品副使四員正七品庫子十人
 至元十年以衣甲監改置 利器庫提點三員大使
 二員副使三員品秩同壽武庫庫子十人 至元五年
 始立軍器庫十年通掌隨路軍器改利器庫 廣勝庫
 掌平陽太原等處歲造兵器以給北邊征戍軍需達魯
 花赤一員大使副使各一員品秩同上 大同平陽太
 原保定真定蔚州宣德東平大寧遼河各路軍器人匠
 提舉司通州薊州各甲局提舉司大都弓匠提舉司
 置達魯花赤提舉同提舉副提舉各一員或有無達魯
 花赤者品秩自從五品至六品不一 懷孟河南汴

彰德大名咸平隆興等路各軍器人匠局益都濟南箭
 局秩皆正七品或從七品各設局使局副一員箭局無
 副咸平隆興有達魯花赤興州松州及廣平路諸甲局
 各院長一員其興州松州屬上都甲局奉聖歸德汝寧
 陳州各軍器局院長一員奉聖文州許州平灤各軍器
 局大都箭局絃局各大使副使一員 上都雜造局秩
 正七品大使副使各一員 大都雜造局提領一員
 豐州雜造局秩正六品達魯花赤大使副使各一員
 皇明製造軍器等事俱屬軍器局及虞衡司隸工部不設
 監

都水監

遼南面都水監設官曰都水太監曰都水少監曰都水監丞曰都水監主簿

金都水監街道司隸馬分治監專規措黃沁河衛州置司

監正四品掌川澤津梁舟楫河渠之事興定五年兼管

勾沿河漕運事作從五品少監正六品以下皆同兼漕

事少監從五品明昌二年增一員衛州分治丞二員正七品內一員

外監分治貞元元年置掾正八品掌與丞同外監分治

大定二十七年添一員明昌三年併罷之六年復置二員勾當官四員准備分治監

差委明昌五年以罷掾設二員興定五年設四員街道司管勾正九品掌洒

掃街道修治溝渠 都巡河官從七品掌巡治河道修

完堤堰栽植榆柳凡河防之事分治監巡河官同此其

瀘溝崇福上下埽都巡河兼石橋使通濟河都巡河

建春宮地分河道諸都巡河官掌提控諸埽巡河官明昌

五年設以今得縣令人年六十者選黃汴都巡河官

下六處河陰元大定二年設滹沱河巡河官二員武延津各設散巡河官

一員于諸局及丞簿庶舉人并見勾當八六十以下者充黃沁都巡河官下四

處懷州孟津孟州城北設黃沁散巡河官各一員 衛

南都巡河官下四處新鄉崇福上崇福下衛南淇上散

巡河官各一員 滑濟都巡河官下四處武城白馬書

城教城散巡河官各一員 曹甸都巡河官下四處東

明西佳孟華陵城散巡河官各一員 曹濟都巡河官

下四處定陶濟北寒山金山散巡河官各一員凡二十

五埽埽

兵萬二千 諸物料場官掌受給本場物料分治監物料場官同此 宣崇福上下埽物料場官與當界官通管收支 南京延津渡河橋官兼譏事管勾一員同管勾一員掌橋船渡口譏察濟渡給受本橋諸物等事內譏察事隸審守司餘浮橋官同此 皇統三年四月懷州置黃沁河堤大勾管司 後罷 元置都水監秩從三品掌治河渠并隄防水利橋梁牌堰之事都水監二員從三品少監一員正五品監丞二員正六品經歷知事各一員 至元二十八年置二十九年領河道提舉司 大德六年陞正三品延祐七年仍從三品 大都河道提舉司提舉一員從五品同提舉

一員從六品副提舉一員從七品 河南山東都水監至正六年以連年河決為患置專疏塞之任設官品秩同 行都水監至正八年二月河水為患詔於濟寧鄆城立行都水監九年又立河南山東等處行都水監十一年十二月立河防提舉隸行都水監掌巡視河道從五品十二年正月行都水監添設判官二員十六年正月又添設少監監丞知事各一員 都水庸田使司 順帝至元二年正月置司平江尋罷五年十二月復立 皇明設都水司官專掌河道一切事屬工部

內侍省

遼北面近侍局設于侍御司 官制見前 南面內省官曰

內省使曰內省副使所屬有內藏庫官曰內藏庫提點
 其內侍省官曰黃門令曰內謁者曰內侍省押班曰內
 侍左廂押班曰內侍右廂押班曰契丹漢兒渤海內侍
 都知曰左承宣使曰右承宣使所屬有內庫官曰都提
 點內庫有尚衣庫官曰尚衣庫使有湯藥局官曰都提
 點勾當湯藥其上京東京各有內省司各置省使與省
 副使東京大內無宮嬪惟以省副判官守之
 金內侍職見于衛尉司內內侍局中常侍見于宣徽使內
 其事多分領于宣徽使而內侍省不設
 元內侍省亦不設其職不專宮禁事即文階亦授之
 按世祖始授宦者李邦寧御帶庫提點後漸遷禮部尚

書提點大醫院事武宗命為江浙行省平章政事仁宗
 時加開府儀同三司為集賢院大學士後又以内侍楊
 光祖為秘書郎譚振宗為武備卿關居仁為尚乘卿並
 授弘文館學士至文宗初年勅自今內侍勿授文階止
 授中官明年即授宦者續元暉昭文館大學士順宗時
 宦者朴不花以皇后寵官至集賢大學士崇正院使驕
 恣無上招權納賂雖為孛羅帖木兒所殺而亂亡不可
 救矣

皇明

太祖平吳之歲置內使監 洪武二年 諭吏部定內侍
 諸司官曰朕觀周禮所記未及百人後世至踰數千卒

爲大患今雖未能復古亦當爲防微之計古時此輩止
治酒漿醢醢司服守桃事今朕亦不過以備使令非別
有委任可斟酌其宜毋令過多又顧侍臣曰此輩自古
以來求其善良千百中不一二見若用爲耳目即耳目
蔽矣用爲腹心即腹心疾矣馭之之道但常戒勅之畏
法不可使之有功有功則驕恣畏法則檢束檢束則自
不敢爲非乃定置內使監奉御凡六十人尚寶一人尚
乳七人尚衣十人尚佩九人尚履八人尚藥七人紀事
二人執膳四人司脯二人司香四人 太廟司香四人
涓潔一人尚酒尚醋尚麵尚染四局局正一人副二人
御馬 御用二司司正一人副二人 內府庫大使

一人副使二人 內倉監令一人丞二人及置 典璽典膳典服典藥典兵典乘六局各局郎一人丞一
人又置門官午門東華門西華門玄武門奉天門左右
順門左右紅門 皇宮門坤寧宮左門宮右門各門正
一人副一人 東宮春和門宮後門宮左門宮右門各
門正一人副一人 上因謂侍臣曰古之宦豎在 宮
禁不過司晨昏供役使而已自漢鄧太后以女主稱制
不接公卿乃以闈人爲常侍小黃門通命自此以來權
傾人主及其爲患如城狐社鼠不可去朕謂此輩但當
服事 宮禁豈可假以權勢縱其狂亂吾所以防之極
嚴但犯法者必斥去之不令在左右戒履霜堅冰之意

也 三年八月定倉庫官品級設監令從五品丞從六
品庫設提點從六品大使從六品副使從七品乙巳
命改內使監 御用監秩皆從三品其官令從三品丞
正四品 皇門官秩從四品門正從四品副正五品
東宮門官正副同十月壬戌重定內使服飾之制 上
諭宰臣凡內使監未有職名者當別置衣帽以別監官
禮部定擬內使監官凡遇朝會照依品級具朝服公服
行禮其常服葵花胸背團領衫不拘顏色烏紗帽犀角
帶其內使無品從者常服團領衫無胸背花不拘顏色
烏角束帶烏紗帽垂軟帶年十五以下者惟帶烏紗小
頂帽從之 四年閏三月 命吏部定內監等官品

內使監令正五品授中衛大夫丞從五品侍直大夫
皇門宮門正正六品授內侍郎門副尚寶奉御俱從六
品授內直郎尚冠等奉御 內府庫大使內倉監令俱
正七品授正奉郎庫副使倉丞俱從七品授正衛郎局
正司正俱正六品授內侍郎局副司副俱從六品授內
直郎 東宮門正局正俱正六品授內侍郎門副局丞
俱從六品授內直郎 王府承奉門正所正俱從六品
授內直郎承奉副門副所副俱正七品授正奉郎 五
年六月丙子定宦官禁令凡內使於 宮城內相罵其
先發而理屈者笞後罵而理直者不坐其不服本管鈐
束而詆罵者杖內使罵奉御者杖罵門官監官者杖內

使等於宮城內闕毆先闕而理屈者杖毆傷者加一等後應理直而無傷者笞其有不服本管鈐束而毆之者杖毆傷者加一等毆奉御者杖毆門官監官者杖傷者各加一等其內使等有心懷惡逆出不道之言者凌遲處死有知情而蔽之者同罪知其事而不首者斬首者賞銀三百兩是年令禮部議考糾劾內官之法置內正司司正司副各一人正從七品專糾內官失儀不法者尋改為典禮司又改典禮紀察司六年六月己酉更倉監為內府倉以內倉監令為大使監丞為副使內府庫為承運庫仍設大使副使皆以內官為之乙卯以內官金麗淵為秦府承奉李清為承奉

副劉壽吳祥劉旺潘亨為晉燕楚靖江府承奉副八年二月壬申以內府鈔庫為寶鈔庫秩正七品設大使副使各一人以內官為之九年五月庚子以內侍宗亮等七十四人為司香尚冠尚衣等職又置王府典膳典珍二所以中官流官為之十年十一月置神宮內使監掌太廟灑掃陳設之事設監令正五品丞從五品司香奉御正七品典簿從九品天地壇祠祭署神壇署各設署令正七品丞從七品司香奉御正八品甲乙丙丁戊五庫庫設大使正七品副使從七品及置皇城門官端門承天門東長安門西長安門東安門東上門東上南門東上北門西安門西上門西

上南門西上北門北安門北上門北上東門北上西門
 門設正正七品副從七品 庚戌以內使金吉為園丘
 署令洪斌杜慶為司香奉御 十二年四月置 內府
 尚衣尚冠尚履三監針工皮作巾帽三局甲乙丙丁四
 庫改尚珮局為尚珮監 十六年三月乙卯置 內府
 寶鈔廣源庫大使一人正九品用流官副使一人從九
 品用內官 內府寶鈔廣惠庫大使二人正九品副使
 二人從九品俱以流官內官兼之職掌出納楮帛入則
 廣源庫掌之出則廣惠庫掌之 十七年四月更定內
 官諸監庫局及外承運等庫局品職 尚宮局尚宮一
 人正五品司記司言司簿司闈正六品掌記掌言掌簿

掌闈正七品女使六人 尚衣局尚儀一人正五品司
 籍司樂司賓司贊正六品掌籍掌樂掌賓掌贊正七品
 女使二人 尚服局尚服一人正五品司寶司仗司衣
 司飾正六品掌寶掌衣掌仗掌飾正七品女使二人
 尚食局尚食一人正五品司膳司醞司藥司饌正六品
 掌膳掌醞掌藥掌饌正七品女使二人 尚寢局尚寢
 一人正五品司設司輿司苑司燈正六品掌設掌輿掌
 苑掌燈正七品女使二人 正功局尚功一人正五品
 司制司珍司綵司計正六品掌制掌珍掌綵掌計正七
 品女使二人 宮正司宮正一人正五品司正一人正
 六品女使二人 內官監通掌內史名籍總督各職凡

差遣及缺員具名奏請設令一人正六品丞二人從六
 品典籍一人正九品所掌文籍以通書美小内使爲之
 神宮監掌 太廟祭器及祭祀灑掃設令一人正七
 品丞一人從七品奉御一人正八品 尚寶監掌 御
 寶圖書凡用 御寶則奏請然後付尚寶司官用之畢
 則捧入設令一人正七品丞一人從七品 尚衣監掌
 御用冠冕衣服靴履設令一人正七品丞一人從七
 品奉御四人正八品 尚膳監掌 御膳設令一人正
 七品丞一人從七品 司設監掌 御用儀仗輦輅衾
 帳裯褥張設設令一人正七品丞一人從七品奉御四
 人正八品 司禮監掌 宮庭禮儀凡正旦冬至等節

命婦朝賀等禮則定其班位儀注及糾察内官人員
 違犯禮法者設令一人正七品丞一人從七品 御馬
 監掌 御廐馬匹設令一人正七品丞一人從七品
 直殿監掌各殿灑掃陳設設令一人正七品丞四人從
 七品小内使一十五人 宮門承 制掌傳奉宣召設
 奉御五人正八品 宮門守門官掌宮門灑掃時其開
 闔譏察出入設門正一人正八品副四人從八品 内
 承運庫掌 宮御金銀段疋等物設大使一人正九品
 副使二人從九品 司鑰庫掌 皇城各門管鑰設大
 使一人正九品副使四人從九品 巾帽局掌造 内
 府冠帽設大使一人正九品副使一人從九品 針工

局掌造 內府衣服設大使一人正九品副使從九品
織染局掌織染段疋設大使一人正九品副使一人
從九品 顏料局掌燒造銀硃等項顏料設大使一人
正九品 司苑局掌種蒔蔬果大使一人正九品 司
牧局掌牧養孳牲設大使一人正九品皆於內官內選
用 外承運庫掌收金銀段疋等物 甲字庫掌收銅
錢布疋顏料 乙字庫掌收衣服衾帳紙劄等物 丙
字庫掌收絲綿紗線 丁字庫掌收銅鉄錫香茶蠟諸
物 戊字庫掌收氈衫胡椒分支收軍器 廣源庫掌
收貯寶鈔 廣惠庫掌收支寶鈔每庫設大使一人正
九品副使一人從九品皆於流官內選用隸戶部 皮

作局掌硝熟皮張成造靴鞋鞍轡 兵仗局掌造各項
軍器 寶源局掌鼓鑄銅器每局設大使一人正九品
副使一人從九品皆於流官內選用隸工部 時 公
主府初設家令司令丞錄事 二十三年改中使司
二十五年二月遣尚膳太監而聶司禮太監慶童齋
勅往諭陝西河州等衛所屬番族令其輸馬以茶給之
聶等至河州召必里諸番族以 勅諭之諸族皆感恩
意爭出馬以獻於是得馬萬三百四十餘疋以茶三十
餘萬斤給之諸族大悅而聶遣使入奏 命以馬分給
河南山西陝西衛所騎士按此內臣奉使行事之始
二十八年九月重定內官監司庫局與諸門官分 東

宮六局 王府承奉等官職秩 頌 皇明祖訓遂爲定制內官監十一曰神宮曰 尚寶曰 孝陵神宮曰 尚膳曰尚衣曰司設曰內官曰司禮曰 御馬曰印綬曰直殿監皆設太監一人秩四品左右少監各一人秩從四品左右監丞各一人秩正六品 神宮監掌灑掃太廟殿庭廊廡尚寶監掌 御寶璽勅符將軍印信 孝陵神宮監掌灑掃殿庭及栽種果木蔬菜之事尚膳監掌供養 奉先殿弁 御膳與 宮內食用之物又督光祿司供奉 宮內諸筵宴飲食之事尚衣監掌御用冠冕袍服履舄靴帶之事司設監掌 御用車轡床榻衾褥帳幔諸事內官監掌成造婚禮裝奩冠冕傘扇衾褥帳幔儀仗及內宮內使貼黃諸造作弁 宮內器用首飾與架閣文書諸事司禮監掌冠婚喪祭禮儀制帛與 御前勘合賞賜筆墨書畫弁長隨當差內使人等出門馬牌等事及督光祿司供應諸筵宴之事 御馬監掌 御馬及諸進貢弁典牧所關收付內官監收用及造內官諸人衣服鋪蓋諸事巾帽局掌造內官諸人紗帽靴襪及預備賞賜巾帽之事司苑局掌 宮內諸處蔬果及種田之事酒醋麵局掌內官諸人食用酒醋麵糖諸物內承運庫掌收支段疋金銀珠玉象牙諸寶貨之物及同司鑰庫掌鈔之數司鑰庫掌各門鎖鑰及收支錢鈔之事 內府供用庫掌 御用香米

及內用香燭油米弁內官諸人飲食果實之類其
東宮典璽典藥典膳典服典兵典乘六局各設局郎一
人秩正五品局丞二人秩從五品惟典璽局增設紀事
奉御秩正六品典璽局掌璽寶翰墨諸事典藥局掌
同御醫修合藥餌供進湯液之事典膳局掌供進膳
羞典服局掌冕弁冠帽袍服佩刀靴襪諸物典兵局掌
甲冑戈矛弓矢刀劍諸物典乘局掌車馬之事其親
王府承奉司掌王府諸事凡事則呈長史司弁護衛
指揮使司行之與內官衙門不相統攝設承奉正秩正
六品承奉副秩從六品所三曰典寶曰典膳曰典服典
寶掌王之寶設典寶正一人秩正六品副一人秩從
六品典膳典服掌飲膳衣服之事各設正一人秩正六
品副一人從六品門官二人掌王城宮殿門啓閉關
防出入設門正秩正六品門副從六品設內使十人司
冠一人司衣三人司佩一人司履一人司藥二人司矢
二人又各公主位下設中使司掌府中諸事司正司
副各一人皆雜職三十年七月庚戌置都知監秩正
四品掌內府各監行移一應關支勘合設太監一人
正四品左右少監各一人從四品左右監丞各一人正
五品典簿一人正六品又置銀作局掌造內府金銀
器用設大使一人正五品副一人從五品

成祖永樂元年九月遣內官李興等齎勅勞暹羅國王

昭祿群膺哆囉諦刺弁 賜王文綺帛及銅錢麝香諸物與其貢使偕行按此內臣奉使外夷之始 三年七月內使王琮同給事中畢進封故真臘國王長子叅烈昭平牙爲王按此內臣封夷王之始 是年三月命太監鄭和等率兵二萬七千人行賞賜西洋古里滿刺諸國按此內臣將兵之始 五年三月辛巳復改上林署爲上林苑監秩正五品有左右副丞典簿之屬凡設十署秩正七品俱以內臣及文職相兼爲之後革內臣八年都督譚青等營有內官王安王彥之三保脫脫按此內臣監軍之始然名次青等後 是年勅內官馬靖往甘肅巡視如鎮守西寧侯宋琥處事有未到處密與之商議務要停當爾却來回話按此內臣出鎮之始然尚止巡視事畢回京 十八年立東廠 命內官一人主之專刺訪大小事情以聞 二十二年六月辛卯 上崩於榆木川太監馬雲等以六師在遠外秘不發喪與大學士楊榮金幼孜議合斂畢載以 龍輦所至 御幄朝夕上食如常儀壬辰次雙筆峰大學士榮御馬少監海壽馳討 皇太子 命內官監太監鄭和領下番官軍備南京在內與太監王景弘朱卜花唐觀保協同管事遇外有事同襄城伯李隆駙馬都尉沐昕計議而行按此南京守備之始 是年二月 勅甘肅總兵官

都督費瓛鎮守太監王安按此鎮守之始見者

宣宗宣德元年七月 上以漢王反遣指揮譚順內官黃讓內使陳錦助平江伯陳瑄鎮守淮安是時內臣尚列于指揮之下 七年 賜司禮監太監金英范弘等免死 詔弘略云克勤夙夜靡一事之後期致謹言行惟一心之在國退不忍于欺蔽進必務于忠誠免爾死罪於將來著朕至意於久遠見弘墓誌

按 宣宗賜免死罪 詔於光祿卿井泉張泌皆有之 則英亦所必有者又 賜 御用太監王瑾銀記四曰 忠肝義膽曰金貂貴客曰忠誠自勵曰心跡雙清見水東日記於司禮太監金英范弘各有銀記之 賜見墓


誌 景廟於興安王誠舒良輩亦各有 賜 憲廟

賜司禮監太監譚昌牙記二曰忠誠不怠曰謙亨忠敬銀記一曰才華明敏石記一曰補衮宣化 世廟 賜司禮監太監張佐銀記四曰集謀補德曰端忠誠慎曰輔忠曰勵忠麥福銀記一曰公勤端慎右皆見墓碑按宣德末年京通二倉設總督內臣一人居中瑞館漕輓者不堪其擾臨徐淮德各設督監內臣紛擾更劇至嘉靖元年從戶部尚書孫交言悉取還京裁革館印中外便之

英宗正統元年遣太監阮安同都督沈清少保吳中督造三殿按此內臣督工之始 四年遣太監吳誠吉祥監

督諸軍討麓川宣慰司任發敗績按此內臣總兵之始
 英宗六年三殿工完太監阮安錢僧保各賜黃金五十
 兩白金一百兩絲段八表裏鈔一萬貫按此內臣功賞
 之至厚者 七年陞太監王振姪千戶山為錦衣衛世
 襲指揮同知尋命山侍經筵 九年命太監曹吉
 祥出喜峰口劉永誠出界嶺口成國公朱勇等出劉家
 口各率精騎萬人征兀良哈陞賞有差 是年賜遼
 東鎮守太監亦失哈歲米四十石按此內臣加祿之始
 十年賜司禮監太監王振各監太監錢僧保高讓
 曹吉祥蔡忠白金寶楮綵幣諸物仍命振姪林為錦
 衣衛世襲指揮僉事僧保姪亮讓姪玉吉祥弟整忠姪

英俱為錦衣衛世襲副千戶 勅振曰朕惟旌德報功
 帝王大典忠君報國臣子至情此恩義之兼隆古今之
 通誼也爾振性資忠厚度量宏深昔在皇曾祖時特
 以內臣選拔事我皇祖深見眷愛茲以詩書王成令
 器委用既隆勤誠益至肆我皇考念爾為先帝所
 器重特簡置朕左右朕自春宮至登大位前後幾二
 十年而爾夙夜在側寢食弗違保衛調護克盡乃心贊
 翊維持靡所不至正言忠告裨益實多茲特勅賜給
 賞擢為爾後者以官詩曰無德不報書曰謹終惟始朕
 眷念爾賢勞昕夕不忘爾尚體至意始終如一致我
 國家有無疆之休爾亦有無窮之聞 十二年遼東鎮



守太監亦失哈楊宣以征討功給歲祿三十六石亦失
哈給七十六石蓋十二石爲一級 十三年寧陽侯陳
懋爲總兵官率師討鄧茂七等太監曹吉祥王瑾監督
神機火器按此內臣監器之始 十四年大理寺卿俞
士悅等以春夏二時不雨恐刑獄不清所致請會審刑
部都察院獄以消天變 上命太監金英同三法司堂
上官審之按此內臣審錄之始出則齋 勅張黃蓋騎
導於大理寺爲三尺壇中坐尚書以下俱左右列坐
是年虜入寇德勝門外 勅太監興安李永昌往同武
清伯石亨尚書于謙整理軍務按此內臣總京營兵之
始

景皇帝景泰三年總督少保尚書于謙總兵武清侯石亨
等議選精兵十五萬分爲十營太監阮讓都督楊俊提
督四營太監陳瑄盧永都督郭震馮宗各提督三營俱
聽謙亨及太監劉永誠吉祥節制按此內臣坐營之始
英宗天順元年正月以迎 駕功陞太監曹吉祥嗣子錦
衣衛帶俵指揮僉事欽爲都督同知姪鉉及太監劉永
誠姪孫聚蔣冕弟成葉達兄成俱爲錦衣衛世襲指揮
僉事且 賜吉祥等 勅書褒諭之 是年封司禮監
太監曹吉祥姪欽爲昭武伯按此內臣子弟封爵之始
欽自以戰功及從奪門封後反誅 是年 詔復司禮
監太監王振官爵立祠 賜額曰旌忠按此內臣立祠

之始 八年 命太監周中於奮武營右少監王亨耀
武營太監唐順練武營右少監林貴奉顯武營太監張
溫敢勇營右少監趙永果勇營奉御鄭達效勇營右少
監米童鼓勇營左副使高蕪立威營奉御王璇伸威營
右副使張璘揚威營奉御張紳振威營監神鎗仍聽太
監劉永誠節制按此內臣分坐十二營之始

憲宗成化三年 御馬監太監葉達奏以長河峒功蒙
賜寶鈔幣帛辭之而陞兄錦衣衛千戶官兵部執以無
例不許 詔特陞爲指揮僉事此內臣辭賞乞陞之始
十二年 命御馬監太監汪直立西廠領 勅刺事
按此立西廠之始雖與東廠倖而勢出其上 十三年

以御史戴縉言革西廠尋復之

按內臣 恩寵至宏加祿建祠所可考者如天順中
御馬監汪直初以緝事功加歲米二十四石以建州
功加三十六石以威寧海功加四十八石以黑石崖功
加三百石後累至四百八十石至正德中司禮監太監
張永初以 恩加歲米十二石以平寧夏逆瑾功加四
十八石以獲妖人功加一百二十石後累至三百餘石
大約米至七十二石則視文武官爲正一品而儀從衣
料亦累增益不可勝計蓋又王振劉瑾之所無也自永
後谷大用魏彬張雄張銳張忠輩亦及之又張司禮佐
初加歲米四十八石其後復加祿十有七皆十二石黃

司禮錦至五百石皆在嘉靖間具神道碑 成化初援
王振例 賜御馬監太監劉永誠特祠額曰褒功 賜
司禮監太監懷恩特祠額曰顯忠恩之後有覃昌其賢
亦相等自是請乞日繁不可勝紀然永誠以功恩以德
與王振不同時寧晉伯劉聚係永誠從子從永誠積戰
功至左都督自以破西虜功封襲

武宗正德元年春正月太監陳寬傳 旨神機營中軍二
司內官監太監劉瑾管五千營 御用監太監張永管
神機營弁顯武營神機營 御馬監徐智調中軍
頭司管奮武營而以司設監太監馬永誠代智 御馬
監太監王潤代瑾 五月以 御馬監太監魏彬管神

機營中軍頭司弁奮武營此八虎之初見也 二年太
監李榮傳 旨邊關隘口等處切近京師舊設守備內
官仍舊添補薊州黃崖口等營以都知監左少監屈讓
臺頭營以都知監右少監王鑑永平太平寨青山營以
司設監左少監萬釗遵化灤陽等關以印綬監右少監
劉睿劉家口營以都知監右少監丞高永薊州鮎魚口
等處以印綬監右少監李準峨眉山等營以 御馬監
左少監馮旺黃花鎮以都知監左監丞張鼎天城兼管
神銳以 御馬監左監丞張仁淮安衛等處以都知監
右少監孟山各守備萬全左衛等處以都知監右少監
畢安分守蓋自是諸邊無餘地矣又增提督團營太監

苗達張永軍伴各百人坐營坐司太監黎安等各三十
五人又增五軍神機三千等營太監馬永成魏彬寧瑾
谷大用軍伴各百人坐司內官劉佶等各三十人 是
年太監李榮傳 旨御馬監谷大用之父奉 御用監
太監張永之父友俱陞錦衣衛指揮使此內臣父見在
授官之始 是年又贈御馬監太監丘聚司設監太監
馬永成御馬監太監魏彬之父俱錦衣衛指揮使毋贈
淑人各與祭一壇此內臣贈父母之始 三年太監李
榮傳 旨御馬監官勇士旗軍係禁兵重務其令太監
谷大用提督太監楊春坐勇士營李堂坐四衛軍營此
內臣預教場之漸 是年復立西廠尋改惜薪司以外

薪廠爲之以太監谷大用領焉 其年添設內辦事廠
於 榮府舊倉地以司禮監太監劉瑾領之兼察兩廠
及內諸司事 太監劉瑾傳 旨谷奉張友俱陞都督
同知復贈劉瑾父三代俱爲都督同知 四年太監劉
瑾奏䟽通益法四事奉 旨經畫周詳防範嚴密誠爲
國家重務既多官會議戶部查筭明白經久通行軍民
戶口食鹽仍舊餘俱永遵行之司禮監立碑在側時常
省察按司禮監立碑始此 五年兵科給事中屈銓䟽
奏請刊定正德元年以後見行事例編集成書頒布中
外 詔許之按此皆劉瑾所變更者國子祭酒王雲鳳
時亦有請 是年太監張永提督三千神機二營兼掌

十二團營掌 乾清宮事兼掌 御用監提督尚膳尚

衣司設內官諸監整容禮儀甜食諸房分豹房浣衣局
混堂司南海子事按內臣兼職之多無踰于此 是年

命御用監太監張永總督寧夏等處軍務 御馬監

太監陸閻管領神鎗選京營精兵三萬討安化王寘鐸
兵部言舊無總督軍務太監關防特造給之時楊一清
為永墓志云特給金關防金瓜剛斧楊與永同事所見
必真永之西征及還師 上皆幸東安門戎服送迎

是年以寧夏功加張永祿米歲四十八石賞銀五百兩
紵絲五十表裏時兵部尚書王敞等會英國公張懋尚
書劉機等議以仇鉞功止一方已封伯爵世襲永輯寧

中外兩建奇功又非鉞比於是永兄富弟容俱封伯給

誥券勛號尋加司禮監太監溫祥賴義李清秦文范

宣張欽祿米歲各十二石賞銀一百兩絲幣四表裏太
監谷大用兄大寬馬永成兄山魏彬弟英伯爵如容富
例 十一月贊皇知縣王鑿疏稱太監張永功言今歲

五月赤旱千里永奉辭西征遇真定大雨隨澍百姓稽
首曰天上雨露張公帶來也永不坐乘不張蓋不作威
福真今之臯夔伊傳先後數千言極其諛媚 上覽奏

褒永亦百餘言再 賜勅獎諭 六年太監張永捕薊
州男子王彥足捏龍文及人王字以為妖異兵部尚書
何鑑請加永 恩典下廷臣議永疏辭 詔以永有功

固讓再加祿米歲百二十石 賜勅褒獎 七年以山東河南賊平總督太監谷大用陸闇歲加祿米四十八石廕弟姪各一人錦衣衛世襲指揮使監鎗張忠尹生歲加祿米二十四石廕弟錦衣衛世襲正千戶 御馬監太監丘聚祿米如張忠大用弟闇姪尋進封伯如永九年起太監張忠掌 御用監仍總制提督宣府大同延綏等處軍務發京營兵二萬人禦虜復發京兵六千人使太監張忠監督之聽永節制忠請曰爲一軍不許 是年 贈司禮太監張淮父全爲錦衣衛都指揮使母李爲夫人廖鑿父文應母張亦如之皆予祭葬 贈都指揮之有祭葬自全文應始 贈御馬監太監于

經父母亦如之并 賜香山寺祠額護 勅授司禮監太監張雄父千戶銳爲後府都督支俸朝參 賜鎮守浙江太監劉璟生祠額護 勅尋 賜代璟者王堂亦如之 十年兵部上打魚王山等處禦虜功內批司禮監太監蕭敬歲加祿米二十四石溫祥賴義秦文張雄張欽蔣貴韋霏張淮并 御馬等監太監谷大用張永魏彬張銳俱歲祿十二石各廕弟姪錦衣衛世襲正千戶 十三年以應州功太監張永魏彬張忠各歲加祿米二十四石廕弟姪一人爲錦衣衛正千戶佛保馬英趙林蘇進馬睿許全李睿劉祥各歲祿十二石廕錦衣衛百戶又加司禮監太監蕭敬溫祥賴義秦文張欽蔣

貴韋霏張淮李英團營太監谷大用東廠太監張銳歲
祿廕官如張永等 十四年以營建 乾清宮定礫廕
總理提督 御用太監張永東廠太監張銳內官監太
監劉養 御馬太監孫和團營太監谷大用司禮太監
蕭敬魏彬溫祥賴義秦文張欽韋霏張淮李英弟姪各
一人為錦衣衛正千戶管工內官監太監劉祥劉永趙
俊王銳班浩汪俊趙銳崔文王富溫璽周永各副千戶
世襲 是年又命 御馬太監張忠提督軍務同威武
副將軍安邊伯朱泰平賊將軍右都督朱暉討寧王宸
濠 命鎮守撫按等官悉聽節制 上尋以太師威武
大將軍鎮國公總督軍務 命太監張永率團營及宣
府北路官軍提督贊畫機密重務平虜伯朱彬亦如之
以捕獲妖賊加太監張忠歲祿米二百二十石仍陞蔭
弟姪三級

世宗嘉靖元年三月 勅吏兵二部朕人繼大統賴爾內
外文武勲戚大臣定策并迎立各宣忠悃保安 社稷
今 山陵及 徽稱大禮事畢宜加殊恩以答元功大
學士楊廷和蔣冕毛紀首先定策忠義大節功尤顯著
俱進封伯爵給與 誥券子孫世襲食祿一千石餘官
如故俱仍在內閣辦事大學士費宏廕他一子錦衣衛
指揮使世襲親捧信符迎立等官駙馬都尉崔元進封
侯爵給與券誥子孫世世承襲食祿一千五百石 皇

親太傅壽寧侯張鶴齡加太師祿米三百石禮部尚書
毛澄加太子太傅廕他一子為錦衣衛世襲指揮僉事定
知太監張錦廕他弟姪一人錦衣衛世襲指揮僉事定
國公徐文祚中途有疾先已賞了罷司禮監各能同心
贊襄大計太監扶安溫祥賴義秦文張欽張淮各歲加
祿米三十六石廕他弟姪一人為錦衣衛世襲指揮同
知蕭敬歲加祿米三十六石廕他弟姪一人錦衣衛世
襲指揮使黃偉鮑忠各歲加祿米二十四石廕他弟姪
一人為錦衣衛世襲指揮僉事從朕藩邸勤勞年久左
右朕躬各有功績張佐歲加祿米四十八石廕他弟姪
一人為錦衣衛世襲指揮使一人為世襲正千戶黃英
歲加祿米三十六石廕他弟姪一人為錦衣衛世襲指
揮同知一人世襲正千戶戴永歲加祿米三十四石廕
他弟姪一人為錦衣衛世襲指揮僉事一人為世襲百
戶張忠歲加祿米二十四石廕他弟姪一人為錦衣衛
世襲指揮僉事刁永馬俊賈友陳宜國洪趙山黃錦李
清王埈孫端各廕他弟姪一人為錦衣衛世襲正千戶
趙霖李堂李云張陞蘇瑾郭紳趙林張昂劉臣劉銳丁
王劉榮各廕他弟姪一人為錦衣衛世襲百戶督兵迎
駕道路惠安伯張偉歲加祿米三十石鄭宗仁趙璜
各陞俸一級當時在朝宗人府五府六部都察院大
理寺通政司等衙門掌印官各賞紵絲二表裏銀二十

兩科道官各賞紵絲一表裏銀十兩 皇親太保建昌侯張延齡加太傅祿米一百石指揮邵嘉進封伯爵副千戶邵輔陞指揮僉事百戶邵佐陞正千戶指揮蔣輪進封伯爵蔣壽陞錦衣衛世襲正千戶慶陽伯夏臣加散官一階舍人夏勳陞錦衣衛世襲正千戶如 勅奉行 六年大學士費宏等言 皇考實錄成其於 聖謨睿德紀載頗爲詳實然臣等不敢自以爲功也蓋累朝實錄皆有章奏可據若今 憲皇帝三十餘年之事臣等所賴以考據者則有司禮監太監張佐黃英戴永紹實錄一冊載 憲皇帝睿製序文及各年章奏爲詳功當首論後又得司禮監太監楊保陳清錦衣衛正

千戶翟裕陞松爲纂修之助功當併論伏惟 上裁上從其言 命廕佐等各弟姪一人以酬其勞佐指揮僉事黃英戴永俱正千戶楊保百戶陳清總旗俱錦衣衛世襲翟裕陞松俱陞指揮僉事時佐英永已用扈駕功 賜廕心不自安上疏辭 上嘉其誠懇許之仍令原廕指揮使張琦於錦衣衛堂上管事指揮同知黃壽陞指揮使僉事戴仁陞指揮同知 八年革鎮守內臣景泰初中官用事始設各省鎮守內臣相沿九十餘年莫能釐正至是閣臣張璠柄政極力陳懇 上盡革之百年大患一旦蠲滌遠近鼓舞若更生永嘉相業此爲稱首 十四年正月科臣管懷理言各倉內臣初蒙

蠶革中外稱便自李宣用而諸倉漸復孚敬奏革鎮守
弊本盡拔偶未及此而王奉李慎謀督京倉竊柄殘民
乞革之戶部梁材覆言我朝酌古定制監局供事于
內府部布治于外體統截然宣德正統始用內臣止一
二人耳正德中濫收多闡民不堪命京通等倉督收有
部臣巡視有臺臣綱舉目張萬世無弊內臣誠爲冗官
及臨淮徐德諸內臣盡宜革回從之十七年郭勛假
條陳時事內欲復鎮守內臣革監收錢穀科道吏部許
讚刑部唐龍工部溫仁和戶部李廷相各言監收應革
兵部張瓚及科道言內臣初詔裁革以其貪殘害民
永不差遣原非太祖舊制上曰內臣雖非舊制姑

暫選用第勿作威喜事耳監收允令罷之二十五年

承天守陵太監廖斌與巡按包節相構上命逮節

詔獄謫戍窮邊

穆宗隆慶元年二月上加恩內臣歲加司禮監太監黃

錦祿米二十四石廕弟姪一人錦衣衛指揮僉事王本

馮保各弟姪一人錦衣衛正千戶胡明喬朗曹憲各弟

姪一人錦衣衛百戶從龍太監梁鈿李芳歲加祿米

三十六石廕弟姪一人錦衣衛指揮同知張仲舉翟廷

玉陳鈿陶金呂用崔玉高相楊義張恩各廕弟姪一人

錦衣衛正千戶宋朝用張潤楊添爵馮明夏雲嚴用李

佑各廕弟姪一人錦衣衛副千戶張廷周保王榮李忠

李鑾趙朝郭陽李惠趙忠陳忠李祿各廕弟姪一人錦衣衛百戶于銳劉用各廕弟姪一人錦衣衛所鎮撫俱世襲 五月司禮監太監黃錦廕姪黃浦為錦衣衛都督僉事尋以罪革後復當廕其弟姪為錦衣衛指揮乃辭 新命而為浦乞復用會錦死事寢至是太監滕祥復為浦請及其族黃保六人以錦衣官守墓黃斌等三人為勇士乞之科道官交論其不可 上曰錦効勞年久素著誠慎黃浦特准起用 七月湖廣巡按劾太和山守備太監呂祥七罪乞徵還罷其官勿設兵部覆言太和山內臣始于成化止以提督道流不預民事罷之便從之祥還司禮監復令劉進往科臣言進即劉俊

先朝守 顯陵以貪酷遣戍 孝陵者也今避籍易名徵求復用退飽虎而復進餓虎可乎 上悟 命擇其代者更議以柳朝往兼分守如故兵部郭乾力爭之上乃 命朝止督道流勿預民事 二年正月 命太監李佑督織造于蘇杭部臣言初奉 明詔取回督造內臣中外傳頌 聖德 詔墨未乾 制使復出殊駭觀聽乞罷佑勿遣第令所司如式以進 上曰有成命矣趣予佑 勅科臣復奏乞如部議不聽 七月內使許義挾刃嚇財御史李學道執而笞之一日 朝罷內使百餘粹學道共毆幾斃舉 朝相顧錯愕科臣以聞 上命緹騎執首禍十餘人杖之百遣戍南裔餘皆

杖發 孝陵從部臣王廷言也 三年十二月 乾清

宮尚衣少監黃雄以番休日私出徵子錢于市因而相

毆兵馬司繫之以白巡城御史楊松既而內監令校尉

趣雄入直校詭以 旨召松驗無實乃劾雄暴橫矯

詔雄亦入辯 上以楊松誣奏貶外司官黜為編氓雄

發南京司香 是年直隸巡按劾鳳陽守備太監趙芬

貪酷驕僭乞下吏記裁其員勿更設兵部覆請下御史

先繫治其黨會議去留從之 十二月 上諭災變頻

仍多緣部院政事不調信人濫訟假公營私致傷和氣

廠衛暗訪以聞科道交章言其不便尋亦罷之 五年

二月太監陳洪弟陳都以廢為錦衣衛千戶科臣疏劾

不聽 六年六月十日 穆宗即位高拱既授 顧命

欲使百官總已之義中人為之側目又與二次輔謀去

馮保以清 宮禁張居正陰洩于保保遂矯 中旨以

去拱六月十一日昧爽傳 皇后懿旨 皇貴妃令旨

皇帝聖旨曰 大行皇帝賓天先一日 召內閣三

臣受 遺命 東宮冲年賴三先生竭忠輔佐以安

社稷今大學士高拱攬權擅政 朝廷威福輒敢自專

不復知有 主上罔測其意欲何為吾母子驚懼不安

高拱令以少師中極殿大學士即日出京回籍其諸大

臣受 國厚恩不知竭忠報主乃阿附權臣箴視幼君

自今各宜洗心滌慮毋蹈此轍校尉兵番共相迫逐一

夕過行自昔大臣去國未聞有狼籍如是者拱去而居正為首輔保掌司禮

今上萬曆八年閣臣張居正疏言該文書官丘得用傳奉

聖諭孫海客用凡事引誘無所不為着降小火者發

去孝陵種菜爾等司禮監并管事牌子既受朝廷

爵祿我一時昏迷以致有錯爾等就該力諫方可爾等

圖我一時歡喜不言我今奉聖母聖諭教誨我我

今改過奸邪已去今後但有奸邪的小人爾等司禮監

并管事牌子一同舉名來奏該衙門知道傳示到閣臣

等看得孫海客用奸邪不忠引誘蠱惑以致虧損聖

德舉動差錯上違聖母慈訓下失臣民仰望之心論

祖宗法度宜正典刑罪在不赦皇上心雖惱恨猶

不忍加刑薄從降斥燭奸之明等于日月宥罪之仁同

於天地矣但臣等查得舊例孝陵種菜皆軍人為之

二犯既發令着役不宜止降火者須充做淨軍乃為正

法上從之居正又疏伏蒙聖諭有先生等既知

此事就該諫朕教朕為堯舜之君卿等也為堯舜之臣

等語皇上幡然改悔進去奸邪引咎自責又宣諭

臣等盡心輔導此蓋九廟列聖之靈默啓我聖

母之心形之譴責陰佑我皇上之心自悔前非也聞

近日引誘之人在孫海客用固為尤甚而其中諂佞希

寵放肆無忌者尚不止如二人如司禮監太監孫德秀

溫恭兵仗局掌印周海者皆不良之人其罪亦不在孫
 海客用之下今 皇上既將此二人寘之於法以示悔
 過自新之意則孫德秀等亦不宜姑容在內以為 聖
 德之累伏望 皇上下大奮乾斷將孫德秀等一體降黜
 以彰 日月之明其司禮監管事牌子等官平日為忠
 為佞諒莫迓於 聖鑒合無俱令自陳請自 聖斷老
 成廉謹者照舊管事諂佞放肆者悉加汰黜且近口
 皇穹垂象彗芒掃宦者之星亦宜大行掃除以應天變
 以光 聖德此 皇上修德改過之實政也臣等又聞
 漢臣諸葛亮云宮中府中俱為一體陟罰臧否不宜異
 同 臣等特待罪輔弼 宮中之事皆宜與聞臣居正又親

承 先帝遺命輔保 聖躬比之二臣責任尤重今乃
 徒避內外之嫌不行直言匡救以致 皇上有此過舉
 辜負 先帝付託之言萬死不足以自贖除痛自省勵
 以圖報稱外既蒙 皇上明發德音昭示 聖意臣等
 此後亦不敢復以外臣自限凡 皇上起居及 宮壺
 內事但有聞即竭忠敷奏及左右近習有邪佞不忠如
 孫海客用等者亦不避嫌怨必舉 祖宗之法奏請處
 治仍望 俯允施行 皇上亦宜仰遵 聖母慈訓痛
 自改悔戒遊宴以重 起居專精神以廣胤嗣節賞賚
 以省浮費却珍玩以端好尚親萬幾以明庶政勤講學
 以資治理庶今日之悔過不為虛言將來之 聖德愈

為光顯矣奉 旨司禮監太監孫德秀溫泰兵仗局掌印周海都降三級着外私家閑住永不叙用其司禮監及管事牌子等都着自陳 十一年奏准小民犯禁私割致傷和氣者都察院行五城御史及通行各省直撫按衙門嚴加禁約自今五年以後民間有四五子以上願以一子報官闖割者聽有司造冊送部候收補之日選用如有私割者照例重治隣右不舉者一併治罪不宥

按 祖制內侍主傳 命掃除不通章奏隆慶以來疏辯謝辭與公卿埒而溫 旨踰溢矣 世宗時前朝門無權稅者至萬曆二十五年以後畿外各省或以征權

或以開礦或以採木奉 委四出矣 太廟尊嚴而皇上行拊廟禮亦皆冠進賢服祭服以從 內府有事于中霤井竈例遣中人代祭亦以祭服從事與 國初亦少異焉

二十九年八月司禮監傳奉 聖旨 乾清宮司禮監太監田義孫隆陳矩成敬管事沈金崔文升劉進孫成周臣張祥牌子馬進田詔劉進忠楊科各陞二級歲加祿米十二石趙朝歲賞祿米十二石 御藥房提督內官監太監王永賞銀五兩紵絲一表裏近侍 御馬監太監孫順歲加祿米十二石煖閣內答應 御馬監太監董杲閔梅李進谷朝何朝邵進內官監太監侯金尚

衣監左監丞李吉祥各賞銀五兩紵絲一表裏 御馬
監太監劉統尚膳監太監劉震趙昇內官監太監鹿成
御馬監太監黃榮司設監太監趙楷俱着內府騎馬
御馬監太監王勛蘇朝俱賞玉帶小轎牌子尚膳監
太監王臣 御用監太監武祥都賞玉帶近侍尚膳監
太監任進殷着本監僉押尚膳監太監張友于忠張全
左允魏受趙忠尚衣監太監王昇陳忠費德黃春芳內
官監太監陳憲楊順溫成王埏張恩司設監太監趙相
張玉王惠 御馬監太監陳進徐志諸明各賞銀五兩
紵絲一表裏內官監左少監盧潤陸太監奉 御蔣升
陸 御用監右監丞管櫃子尚膳監太監王奉李守寧


都賞蟒衣人數司房內官監太監韋仁賞銀五兩紵絲
一表裏尚衣監左監丞任時 御用監左監丞殷良弼
俱陞右少監尚膳監右監丞白吉祥陞左監丞奉御李
宗仁陞 御用監右監丞小次者楊進朝賞牙牌帶管
司房 御馬監太監袁福賞銀五兩紵絲一表裏 御
用監太監黃佩賞飛魚尚衣監左少監羅俊陞太監尚
膳監左監丞劉進忠周尚德劉忠李進朝俱陞左少監
又司禮監傳奉 聖旨各處礦稅天津等處督征廣安
店租 御用監右少監馬堂陞左少監廣東抽稅蕪管
珠池內官監太監李鳳賞蟒衣福建開礦蕪抽稅 御
馬監右少監高家陞左少監雲南開礦蕪抽稅尚膳監

太監楊榮賞斗牛遼東等處開礦征收稅課馬市方物
尚膳監右少監高淮陞左少監管理通灣廣和店租帶
管蘆溝橋抽稅名馬 御馬監太監張燁賞斗牛江西
湖口征收船稅 御馬監左監丞李道陞右少監總理
兩淮鹽法 御用監太監魯保賞斗牛儀真等處抽稅
御馬監左少監暨祿陞太監浙江抽稅兼開礦劉成
陞少監四川礦稅 御馬監太監丘乘雲賞銀五兩紵
絲一表裏陝西抽稅名馬 御馬監右少監梁永陞左
少監山西太原府等處抽稅兼採木尚衣監右監丞孫
朝陞左監丞廣西等處水路通御矣土產貨物稅課及
開採礦稅 御馬監右少監沈永壽陞左少監南京徵

收房租帶管池州等處開採南京中備司禮監太監邢
隆劉朝用各歲加祿米十二石 外有王虎張忠賞銀
五兩紵絲一表裏胡濱李敬每陞右少監俱在近侍例
內又司禮監副蘇松織造太監孫隆進到秋運龍袍漆
器織造的好奉 旨歲加祿米十二石 又傳奉 上
旨司禮監太監孫隆着在內坐櫬

按中貴柄司禮則王振劉瑾數將大兵則曹吉祥汪直
然皆不克令終惟張永初自 春宮得幸於 上累加
提督三千神機二營兼掌十二團營 乾清宮掌事兼
掌 御用監提督尚衣司設內官二監整容禮儀誦食
諸房分豹房浣衣局混堂司南海子出總督寧夏等處

軍務特給金關防金爪鋼劍還改司禮監太監掌監
 事再起掌御用總制提督宣大延固等處軍務還總
 理乾清大工再督團營兵馬從上禦虜應州為監
 督機務從上征寧庶人為提督贊畫重務罷閑復起
 掌御用提督團營凡一縮司禮三縮御用綬三督
 團營再總大兵再扈上領樞密出許便宜行事及撫
 鎮聽制父友科都督同知兄泰安伯富弟安定伯容右
 都督寰餘官復十餘人貴勢傾一時而名位不衰又
 國初內官監太監鄭和以永樂四年率師二萬七千人
 駕海舶齋勅諭金帛行賚西洋瑣里暹羅等三十餘
 國皆隨使入朝所奉獻及互市採取未名之寶以巨萬
 計凡一破國都再虜逆命王一擒大盜酋凡二十年
 而首命提督南京守備至宣德八年復齋詔由陸
 路諭西番諸國今西南夷及世所稱三寶太監者鄭
 和也西北所稱劉馬太監者則共廟時劉永誠也皆
 本朝中貴之翹楚云





卷之九十三終

